

रोमियन क पत्र

1 पौलुस जउन मसीह ईसू क दास अहइ, जेका परमेस्सर प्रेरित होइ बरे बोलाएस, अउर उहइ क परमेस्सर क सुसमाचार लोगन क सुनावइ बरे चुना गवा।

2इ बात क घोसना नबियन दुआरा पवित्तर सास्तरन में पहिलेन स करि दीन्ह ग रही। 3-4इ सुसमाचार परमेस्सर क पूत ईसू मसीह क अहइ। जउन तने स दाऊद क बंसज अहइ। अउर उहइ हमार पभू अहइ। सरीर स तो उ दाऊद क बंस में जनम लिहे रहा मगर पवित्तर आत्मा स तो उ परमेस्सर क पूत रहा। ओका परमेस्सर क पूत इहइ बरे माना जात रहा। जउन ओकरे भीतर मरि क फिन जी उठइ क समरथ रहा। 5इहइ क जरिये मोका अनुग्रह अउर प्रेरित होइ क मिला बा जेहसे सबहिं यहूदियन में, ओकरे नाउँ स, उ आस्था जउन बिसवास स जनम लेत ह ओहमों पइदा कीन्ह जाइ सकइ। 6परमेस्सर क जरिये ईसू मसीह क होइ बरे तू पचे बोलावा ग अहा।

7उ पत्र मई, तू सबन बरे, जउन रोम में अहई अउर परमेस्सर क पियारा अहा, जउन परमेस्सर क पवित्तर जन होइ बरे बोलावा ग अहा, लिखत अहउँ।

अब हम इ चाहित ह कि तू लोगन क परमेस्सर अउर हमरे पभू ईसू मसीह क अनुग्रह अउर सान्ति मिलइ।

धन्यबाद बरे पराथना

8सबसे पहिले तो मई ईसू मसीह क जरिये परमेस्सर क धन्यबाद करइ चाहित ह। इ सब तोहरे सब क बरे अहइ काहेकि दुनिया क सब मनई तोहरे सब के बिसवास क बारे में बतियात हीं। 9पभू जेकरे सेवा मई जी जान स करित हउँ काहेकि मई ओकरे पूत क सुसमाचार क लोगन क सुनावत हउँ। पभू मेरा साच्छी दिहा जउन मई तोहका हर दम याद करत अहउँ। 10अपने पराथना में इ मई हर दम मनाइत हउँ कि परमेस्सर की चाह स मोर तोहरे लगे आवइ क यात्रा पूरी होइ। 11मई बहुत दिल स इ चाहित ह कि तू लोगन स मिली अउर तोहका कछू आत्मिक उपहार देइ जइसे तू पचे खूब सक्तिशाली होइ जा। 12या मोका कहइ चाही कि जब मई तोहरे बीच में होब तउ एक दूसर क बिसवास स आपुस में प्रोत्साहित होब। 13भाइयो अउर बहिनियो! मई इ चाहित हउँ कि तू पचे क इ तउ मालूम होइ जाइ कि मई तोहरे लगे बार-बार आवइ क योजना बनाइत हउँ। एकर इ कारन इ अहइ कि गैर यहूदियन में जइसा फल मोका मिला ह इ उहइ तू लोगन स भी मिलइ। लेकिन अब तलक-न-कउनो बाधा पड़त रही।

14अब इ जान ल्या कि जे यूनानियन अहई उनके अउर जे गैर यूनानियन अहई ओनहूँ क, जे होसियार अहई उनके

अउर जे बेउकूफ अहई ओनहूँ क सबइ क हमरे ऊपर सेवा करइ क सिन अहइ। 15यही बरे तू लोगन क जे रोम में रहत ह्या ओनका मई इ सुसमाचार सुनावइ क तैयार हउँ।

16इ सुसमाचार क सुनावइ क मई सरमाइत नाहीं काहेकि जउन भी ओहमों बिसवास रखत अहई ओनके उद्धार बरे परमेस्सर क सामर्थ्य अहइ। ओहमों पहिले यहूदियन अउर फिन गैर यहूदियन क। 17काहेकि सुसमाचार में इ बतावा ग बाटइ कि परमेस्सर मनइयन क अपने ठेकाने कइसे लगावत ह। इ सब कुल बिसवास प अहइ, सास्तरन में इ लिखा अहइ, “धर्मी मनई स सदैव जितत अहई” *

सबहिं तउ पाप किहे अहई

18सरग स परमेस्सर का कोप लोगन क न कहइवालन अउर अधार्मिक काम पइ परगट होत ह जे सत्य का अधरम स दबावत हीं अउर जे बुरे करम करत हीं। 19इ बात नाहीं अहइ कि केउ ऐका जानत नाहीं परमेस्सर का सबइ जानत ह काहेकि परमेस्सर सबका जनाइ देत ह। 20इ संसार जब स देखाइ पड़ा तबइ स परमेस्सर क अनन्त सक्ति परमेस्सर क साफ देखात ह उहउ क एक एहसे जाना जाइ सकत ह जेका परमेस्सर खुदइ बनाइस ह। एहसे लोगन क पास कउनो बहाना नाहीं बाटइ उ बुरा काम बरे जेका उ करत ह। 21अगर इ सबइ परमेस्सर क जानत हीं तबउ उ पचे परमेस्सर क महिमा क इज्जत नाहीं करत हीं। उनके विचार गलत कामन में लग गएन अउर मन में अँधियारा छाइ गवा। 22उ पचे अपने क बहुत बुद्धिवाला समझत रहेन मुला सब क सब बन्न मूरख रहेन। 23अउइ जउन परमेस्सर अहइ उ कबहुँ मर नाहीं सकत मुला इ सबइ ओका मरइवाले लोगन चिरिया, गोरु, अउर साँप क मूत में देखेन अउर समझइ लागेन।

24एह बरे परमेस्सर ओनह क बदनियती क हाथे साँप दिहेस अउर उ पचे दुराचार में पड़ि क एक दूसरे क सरीर क साथ खिलवाइ करइ लागेन। 25उ लोगन झूठ क साथे परमेस्सर क सत्य क सौदा किहन अउर वे सृष्टि क बनावइवाले को तजिके अउरन क आराधना करइ लागेन। परमेस्सर धन्य अहइ। आमीन!

26इहइ बरे परमेस्सर ओनह का नीच वासना क हाथें साँप दिहेस। ओनह क स्त्रियन सहज यौनाचार क बजाय अप्राकृतिक यौन करइ लागिन। 27एहइ तरह पुरुसन भी सहज सम्भोग छोड़ि क समलैंगिकता क चक्कर में पड़ि गएन। अउर पुरुस परस्पर एक दूसरे क साथ बुरे करम

करइ लागेन। अउर इ सब कुकरमन क फल भी मिलब सुरु होइ गवा। 28कानन इ रहा कि ओन्हन परमेस्सर का पहिचानब बन्द कइ दिहेन तो परमेस्सर ओन्हन का कुबुद्धि क हाथ सौंप दिहेस। अउर उ सब ओनन्ह क करइ सुरु दिहेन जउन ना करइ क चाही। 29लोग कुल अधरम दुस्तता, लालच अउर द्वेस स तथा सारी ईर्स्या, हत्या, झगड़े, छल, अउर डाह स भर गएन। बे बकवादी, अउर कहानियन क गढ़त रहेन।

30उ सबइ निन्दक अहईं। परमेस्सर स घिना करत रहत उदण्ड अउर घमण्डी अहईं, बढ़-बढ़ क बोलत हीं। कुलिन्ह बुराइन का जनम दाता अहईं। अपने महतारी बाप क कहब नहीं मानत रहेन। 31उ पचे मूरख, वचन तोरइ वाले निरदयी अउर वगैर पिरेम क बाटेन। 32उ सब परमेस्सर क व्यवस्था क जानत हीं कि इ सब बातन स मउत क जोगग अहईं तउनो पइ ओ सबइ न सिरफ इ सब कुकरम करत हीं बरन अइसा करइवालेन क समर्थन भी करत हीं।

तू सबइ पापी अहा

2 अरे वो, सुना ह, मोर मित्र तू सब निआव करत अहा मुला तू उहइ करत अहा जउन बरे दूसरन का सजा देत अहा तू का कउनो बहाना नहीं चल सकत अहा। उहइ स तू अपने आपको भी अपराधी सिद्ध करत अहा काहेकि तू जिन करमन क निआव करत अहा ओनका आप खुद भी करत अहा। 2अब हम पचे इ सब जानइ लागिन कि जे अइसन काम करत ह ओनका परमेस्सर उचित निरनय देत ह। 3मुला मोर दोस्त तू सुना, तू का सोचत ह कि जउने बरे तू दूसरन पर निरनय देत अहा अउर अपनउ उहइ काम करत ह तउ तू का समझत अहा कि तू परमेस्सर क निआव स बच सकत ह। 4या तू ओकरे अनुग्रह ब सहनशीलता अउर धीरज का हीन समझत बाट्या तू लोगन इ बात क अपेक्षा करत अहा कि परमेस्सर क अनुग्रह तोहार मनफिराव करत अहइ। 5मुला तू पचे जान ल्या कि अपने कठोरता अउर कबहुँ न पछताइवाले मन क कारण तू परमेस्सर क गुस्सा का बहोत दिना बरे बटोरत अहा जब परमेस्सर क सचमुच निआव परगट होइ। 6परमेस्सर सबन का ओकरे करतब क कारण फल चखाई। 7जे अच्छा काम करत बा, परमेस्सर क महिमा आदर अउर अमरता का खोजत बा, उ सब तो अनन्त जीवन पइहीं। 8मुला जे अपने स्वारथ स सत्य पर नहीं चलिके बस अधरम करत बाटेन ओन्हन का ओकरे बदले में क्रोध व प्रकोप मिली। 9उ सब मनइयन पै दुःख अउर संकट आई जे अधरम पर चलत अहईं। पहले यहूदियन फिन उ लोग जे गैर यहूदियन अहईं। 10इहइ तरह जे कोई अच्छाई प चलइ ओका महिमा स आदर अउर सान्ति मिली, पहले यहूदियन क फिन गैर यहूदियन अहईं। 11काहेकि परमेस्सर केहू क साथे भेदभाव नहीं करत।

12जे व्यवस्था क पाए बगैर पाप किहेन उ सब व्यवस्था क बाहेर ही उ छिन्न होइ जइहीं अउर जे व्यवस्था में रहिके पाप किहेन ओनकइ निपटारा व्यवस्था क अन्दरइ दण्ड दीन्ह जाई। 13काहेकि जे कोई सिरफ व्यवस्था क

कथा सुनत ह परमेस्सर की दृष्टि में धर्मी नहीं अहइ बल्कि जे व्यवस्था पर चलत अहईं उही धरमी कहरावा जइहीं। 14सो जब गैर यहूदियन जेनके लगे व्यवस्था नहीं बा, सुभाव स व्यवस्था क बातन पर चलत ह, तउ चाहे ओनके पास व्यवस्था न भी होइ तउ भी उ आपन व्यवस्था खुद ही अहईं। 15उ लोगन अपने मन प लिखे व्यवस्था क करमन का देखावत बाटेन। ओनके विवेक ओनकइ साच्छी अहईं। ओनके मानसिक संघर्ष ओनका अपराधी व निरदोस कहत अहइ। 16इ सब बातन उ दिना होइही जउने दिना परमेस्सर मनइयन क छुपी बातन क, जउने क मईं उपदेस देइत हउं इ उ सुसमाचार क मुताबिक मसीह ईसू निआव करी।

यहूदियन अउर व्यवस्था

17काहेकि जदि तु सब अपने क यहूदी कहत ह अउर व्यवस्था में तोहार बिसवास अहइ अउ अपने परमेस्सर प तोहका घमण्ड बाटइ 18अउर तू परमेस्सर क इच्छा का जानत आहा अउर उत्तिम बातन का ग्रहण कर सकत ह काहेकि परमेस्सर तोहका इ सब सिखाइस ह 19तू इ तउ मानत ह कि तू आंधरे क अगुआ अहा, जे आंधरे में भटकत अहईं, ओनकइ बरे तू उजियारा अहा, 20अबोधन क तू सिखावइवाला अहा, लरिकन क तू उपदेस देइवाला अहा काहेकि व्यवस्था में तोहका साच्छात गियान अउर सत्य ठोस रूप स पाइ ग अहा। 21जउन तू पचे दुसरन का सिखावत ह ओका आपन क काहे नहीं सिखउल्या। तू इ उपदेस देत अहा कि चोरी न करा, मुला खुद चोरावत अहा। 22तू इ कहत अहा कि व्यभिचार नहीं करइ क चाही मुला अपुना काहे करत ह। मूरतिइन स तू घिना करत अहा मुला मंदिरन में धन काहे छीनत ह? 23तू लोग व्यवस्था प गरब करत ह, मुला व्यवस्था का तोरि क परमेस्सर क निरादार काहे करत ह? 24अउर इहइ बात पवित्तर सास्तरन में लिखी बा, “तू सबन क वजह स परमेस्सर क नाईं क ओनमा अपमान होत ह जे गैर यहूदियन अहईं।” *

25जउ तू लोगन व्यवस्था क मानत अहा अउर ओका पालन करत ह तउ तो खतना क महत्व बाटइ। मुला जदि व्यवस्था क तोड़त अहा तो ओकर मतलब वगैर खतना क बराबर अहइ। 26मान ल्या केहू क खतना नहीं भवा बा अउर उ व्यवस्था क पालन करत ह पवित्तर नियमन प चलत ह, तउ का ओकर खतना न करावइ क बावजूद ओका खतना में सामिल न कीन्ह जाइ? 27उ मनई जेकर सरिर स खतना नहीं भवा बा मुला व्यवस्था क पालन करत ह उ तू लोगन का अपराधी सिद्ध कइ देई। वोका जेकरे पास लिखा पढ़ी में परमेस्सर क विधान बाटइ अउर जेकर खतना भवा बा अउर जे व्यवस्था क नहीं मानत।

28जे बाहेर स यहूदी अहईं, उ वास्तव में यहूदी नहीं अहइ। सरिर क खतना असली में खतना नहीं बाटइ। 29सच्चा यहूदी उ अहइ जे भीतर स यहूदी होइ, सच्चा खतना तउ आत्मा क जरिये मन क खतना अहइ। नबी न

कि लिखी व्यवस्था क। अइसे व्यक्ति क प्रसंसा मनई नाही बल्कि परमेस्सर कइँती स कीन्ह जात अहइ।

3 अब यहूदियन होइ क लाभ या अउर खतना क महत्ता केँतनी बा? **2** यहूदियन होइ क बड़ी महत्ता अहइ, काहेकि सबसे पहिला इ कि परमेस्सर क उपदेस ओनहिन का सौपा गवा रहा। **3** ओन्हन में स कछू एक धोखाबाज होइ, अहइ तउ का अहइ? ओन्हन धोखाबाजेन क वजह स परमेस्सर क बिसवास तो नाही कम होइ जात? **4** बिल्कुल नाही, सबइ झूठे होइ जाई तबउ परमेस्सर सच्चा रही, इ बात पवित्तर सास्तरन में लिखी बाटइ:

“जब तू बोलब्या तउ तोहका सबइ पतियइहई जब तोहार न्याय होई, तउ तू जितब्या।”

भजन संहिता 51:4

5 अगर मनई क अधार्मिकता में परमेस्सर की धार्मिकता सिद्ध करत ह, अइसन में हमका का करइ क चाही? का परमेस्सर हम पइ कुपित होइ क मनइयन क दण्ड देत ह? (मई मनई क नाई आपन बात कहत हई) **6** बिल्कुल नाही, नाही तो परमेस्सर जगत क निआव कइसे करी?

7 मुला तू इ कहि सकत ह, “मोरे झूठ बोलइ स परमेस्सर क सच उजागिर होत ह तउ एहसे ओकर महिमा ही होत ह; फिन मोका दोखी (पापी) काहे का बतावत ह?” **8** इ कहइ क वइसे होई काहे, “अगर हम बुरा काम करी तउ भलाई उजागिर होइ।” अइसेन आरोप हम पचन क ऊपर लोग लगावत हीं। इ सबइ लोग जे इ कहत हीं कि हम पचे ओनका पढ़ाइत ह। अइसे लोग दोखी कहा जाइ लायक अहई ओनका सजा देइ चाही।

सबहि लोग दोखी अहई

9 फिन का भवा? यहूदी अउ गैर यहूदियन में कउनो भेद नाही बा, जइसेन कि पहले बतावा गवा बा कि चाहे यहूदियन होई या गैर यहूदियन सबहीं पाप क बस में अहई। **10** पवित्तर सास्तरन कहत हीं:

“कउनो धर्मी नाही अहइ, एक तु भी नाही।”

11 एकउ भी समझदार नाही, एकउ क उ अइसा नाही उहइ जे परमेस्सर क वास्तव में खोजत ह।

12 इहाँ प सबइ परमेस्सर स विमुख होइके भटकत अहई, सबन खोटे अहई। एकउ नाही अहइ जे अच्छा काम करत ह एकउ नाही।”

भजन संहिता 14:1-3

13 “ओनकर मुँह खुली कब्र अहइ, अउर वे अपनी जीभ स धोखा देत अहई।”

भजन संहिता 5:9

“नाग क बिख क तहर ओनकर ओठ अहई,”

भजन संहिता 140:3

14 “मुँह पइ सराप व कटुता भरी रहत ह।”

भजन संहिता 10:7

15 “जान मारइ का तउ हरदम उतावला रहत हीं।

16 जहाँ कहुँ जात हीं उ पचे नास ही करत हीं, अउर संताप ही देत हीं।

17 सान्ति का मारग इ नाही जनतेन।”

यसायाह 59:7-8

18 “ओनके आँखिन में पर्भू क भय नाही बा।”

भजन संहिता 36:1

19 अब हम पचे इ जानित ही कि व्यवस्था में जउन कछू कहा गवा बाटइ उ सब ओनके बरे अहइ जे व्यवस्था क अधीन अहई। एहसे इ होइ कि सबइ का मुँह तोप दीन्ह जाइ अउर परमेस्सर क दण्ड सबइ क मिलइ। **20** व्यवस्था में कउनो काम किहे स कउनो धर्मी न सिद्ध होइ जाइ। केवल व्यवस्था पाप क बोध करावत अहइ।

परमेस्सर मनइयन का धर्मी कइसे बनावत ह

21 मुला अब इ देखइ क अहइ कि परमेस्सर एक नए तरीके स मनइयन क व्यवस्था क बगैर कइसे सोझ मारग प लावत ह। व्यवस्था व नबियन इ नए तरीके क साच्छी दिहे बाटेन। **22** जे केउ परमेस्सर क उ धार्मिकता जउन ईसू मसीह में बिसवास क द्वारा इ बिसवास करइवालन क बरे अहइ। एहमाँ कउनो भेदभाव नाही बा। **23** काहेकि सबइ तउ पाप किहे बाटेन अउर सबइ तउ परमेस्सर क महिमा स विहीन बाटेन। **24** मुला ईसू मसीह का विसेख महिमा क अनुग्रह स उ पचे सेत मेंत में उपहार पाइके धर्मी ठहरावा गवा अहई। **25** परमेस्सर ईसू मसीह क मारे लोगन क दिहेस कि लोग ओहमाँ बिसवास करई अउर अपने पापन स मुक्ति पाइ जाई। उ इ काम ईसू मसीह क बलिदान द्वारा करवाएस। अइसा इ प्रमाणित करइ क बरे कीन्ह गवा कि परमेस्सर बहुत सहनशील अहइ। काहेकि उ पहिले ओनका बिना दण्ड दिहे छोड़ दिहस रहा।

26 आजउ परमेस्सर ईसू को दिहेस हमका इ सिद्ध करइ बरे कि परमेस्सर जउन करत ह उहइ सही बा। परमेस्सर इ किया कि यह देखावइ बरे कि वह सही निरनय लेत ह, अउर उही समइ वह कउनो मनई क ठीक बनाइ सकत ह, जेनकर ईसू मसीह में बिसवास अहइ।

27 घमण्ड तउ एक दम्पै खतम अहइ। उ अइसेन कि व्यवस्था क मुताबिक करम किहे स नाही बहोतउ विधी क अपनाये स जेसे बिसवास कीन्ह गवा अहइ। **28** मनई व्यवस्था क मुताबिक काम कइके नाही मुला बिसबास स धर्मी बनत ह। **29** का परमेस्सर सिरिफ यहूदियन क अहइ? का उ ओन्हन क ना होइ जे गैर यहूदियन अहई? हाँ उ ओन्हन क अहइ जे गैर यहूदियन होई। **30** चूँकि केवल एक ही परमेस्सर अहइ। उ यहूदियन, का ओनकर बिसवास क द्वारा सही बनवाई, अउर उ गैर यहूदियन क भी ओनकर बिसवास क द्वारा सही बनवाई। जे ओहमाँ बिसवास करी उहइ धर्मी कहा जाई। **31** तउ का मई बिसवास क द्वारा व्यवस्था क विफल करत अही? ना बिल्कुलै नाही बल्कि हम पचे तउ व्यवस्था का अउर सक्तीवाला बनवत अही।

इब्राहीम क उदाहरण

4 त फिन हम का कही कि हमारे सरीर क पिता इब्राहीम क एहमाँ का मिला? काहेकि अगर इब्राहीम क ओकरे कामे क कारण धर्मी ठहरवा जात ह त ओका गरब करइ क बात रही। परन्तु परमेस्सर क सामने उ सही में गरब नहीं कइ सकत। 3पवित्तर सास्तर का कहत ह, “इब्राहीम तउ परमेस्सर में बिसवास किहेस अउर उ ओकर धार्मिकता गना गवा।”*

4काम करइवालान क मजदूरी देब कउनउ दान नहीं बा, उ तउ ओनकर अधिकार अहइ। 5परन्तु अगर केउ काम करइके बजाय उ परमेस्सर में बिसवास करत ह, जउन पापी क केउ छोड़ देत, तउ ओकरे बिसवास ओनकर धार्मिकता क कारण बन जात ह। 6अइसे ही दाऊद उ मनई क धन्य मानत ह जेका करमन क आधार क बिना परमेस्सर धर्मी मानत ह। उ जब कहत ह:

7“उ धन्य अहइ जेनके व्यवस्था रहित कामन क छमा मिली अउ जेनके पापन क मूँद दीन्ह गवा।

8उ मनई धन्य अहइ जेनके पापन क परमेस्सर गिनेस नहीं!”

भजन संहिता 32:1-2

9तब का इ धन्यपन केवल ओनहीं क बरे बा जेनकर खतना भवा। बा, य ओनके बरे उ सबइ जेनकर खतना नहीं भवा। (हाँ, इ ओनपइ उ लागू होत ह जेनकर खतना नहीं भवा बा।) काहेकि हम सबइ तउ कहे अही इब्राहीम क बिसवास इ ओकर धार्मिकता गिना गवा। 10तउ इ कब गिना गवा जब ओकर खतना होइ चुका रहा। या जब उ बगैर खतना का रहा नहीं खतना होइके पाछे नहीं बल्कि खतना होइके स्थिति स पहिले। 11अउ फिन एक चिन्ह क रूप में उ खतना ग्रहण किहेस। जउन उ बिसवास क परिणाम सरूप धार्मिकता क एक छाप रही जउन उ ओह समइ दरसाए रहा जब ओकर खतना नहीं भवा रहा। इही बरे उ ओन्ही सबन क पिता रहा जउन यद्यपि बिना खतना क रहेन परन्तु बिसवासी अहइ। (इही बरे उ सबइ धर्मी गिना जइहीं)

12अउर उ ओनकर भी पिता अहइ जेनकर खतना भवा बा परन्तु जउन हमार लोगन पूर्वज इब्राहीम क बिसवास क ही मारग क जेका उ खतना होइ स परगट किहे रहेन, अनुसरण करत हीं।

बिसवास अउर परमेस्सर क बचन

13इब्राहीम या ओकर बंसजन क इ बचन कि उ पचे संसार क उत्तराधिकारी होइहीं, व्यवस्था स नहीं मिला रहा बल्कि उ धार्मिकता स मिला रहा जउन बिसवास क जरिये पैदा होत ह। 14अगर जे व्यवस्था क मानत हीं, उ जगत क उत्तराधिकारी अहइ तउ बिसवास क कउनउ मतलब नहीं रहत ह अउर परमेस्सर की प्रतिग्या बेकार होइ जात ह। 15लोगन के जरिये व्यवस्था क पालन न किहे जाइसे परमेस्सर क किरोध उपजत ह परन्तु जहाँ व्यवस्था इ नहीं बा उहाँ व्यवस्था क तोड़बइ का?

“इब्राहीम ... गवा” उत्पत्ति 15:6

16इही बरे सिद्ध अहइ कि परमेस्सर क प्रतिग्या बिसवास क फल अहइ (अउर यह सेंटमेत में ही मिलत बाटइ।) सो ओकर प्रतिग्या इब्राहीम क सबहिं बंसजन क बरे सुनिश्चित बा, न केवल ओनके बरे जे व्यवस्था पर बिसवास करत हीं बल्कि ओन सबक बरे भी जउन इब्राहीम क समान बिसवास रखत हीं। उ हम सबका पिता अहइ। 17पवित्तर सास्तरन बतावत ह, “मई तोहका (इब्राहीम) कइयउ रास्ट्र क पिता बनाएउँ।”* उ परमेस्सर क दिस्टी में उ इब्राहीम हमार पिता अहइ जेह पर ओकर बिसवास बा। परमेस्सर जउन मरे हुवन क जीवन देत ह, अउर जो वस्तुअन अहइ ही नहीं, ओनकर नाम अइसे लेत है जइसे मानों उ अहइ।

18सभन मनइयन क आसा क विरुद्ध अपने मने में आसा सँजोए भाए इब्राहीम ओहमें बिसवास किहेस इही बरे उ कहा गवा क अनुसार कइयउ रास्ट्र क पिता बना। “तोहार अनगिनत बंसज होइहीं।”* 19इब्राहीम लगभग एक सौ बरिस क होइ गवा रहा, अउर ओकर सरीर बच्चा पइदा करे जोगग नहीं रहा। सारा भी बच्चा पइदा नहीं कइ सकत रही। एह बारे सोचेस, लेकिन ओकर बिसवास डगमागात नहीं। 20परमेस्सर क बचन में बिसवास बनाए रखेस एतना ही नहीं बिसवास क अउर मजबूत करत भवा परमेस्सर क महिमा दिहेस। 21ओका पूरा भरोसा रहा कि परमेस्सर ओका जउन बचन दइ दिहेस ओका पूरा करइ में पूरे तरह समरथ बा। 22इही बरे, “इ बिसवास ओकर धार्मिकता गिना गवा।”* 23पवित्तर सास्तर क इ बचन कि बिसवास ओकर धार्मिकता गिना गवा, केवल ओनके बरे बा 24बल्कि हमरे बरे भी बा परमेस्सर हमका, जउन ओहमाँ बिसवास रखत हीं, धार्मिकता स्वीकार करी। काहेकि हम बिसवास करत ह कि उ हमार पभू ईसू मसीह क फिन स जिन्दा किहेस। 25ईसू जेका हमरे पापन क बरे मारा जाइ क सौपा गवा अउर हमका धर्मी बनावइ क बरे, मरा हुवन में स फिन स जिन्दा कीन्ह गवा।

परमेस्सर क पियेम

5 काहेकि हम अपने बिसवास क कारण परमेस्सर बरे धर्मी होइ ग अही, तउ अपने पभू ईसू मसीह क जरिये हमार परमेस्सर स मेल होइ गवा बा। 2उही क जरिये बिसवास क कारण ओकरे जउन अनुग्रह में हमार स्थिति बा, ओह तलक हमार पहुँच होइ गइ रही। अउर हम परमेस्सर क महिमा क कउनउ आसा पावइ क आनन्द लेइत ह। 3एतनइ नहीं हम आपन विपत्तियन में आनन्द लेइत ह। काहेकि हम जानित ह कि विपत्ति धीरज क जनम देत ह। 4अउर धीरज स खरा चरित्र निकरत ह। खरा चरित्र स आसा क जनम होत ह। 5अउर आसा हमका निरास नहीं होइ देत ह काहेकि पवित्तर आत्मा क जरिये, जउन हमका दीन्ह गवा बा, परमेस्सर क पियेम हमरे हिरदय में उड़ेर दीन्ह गवा बा।

“मई ... बनाएउँ” उत्पत्ति 17:5

“तोहार ... होइहीं” उत्पत्ति 15:5

“इ ... गवा” उत्पत्ति 15:6

6काहेकि हम जब अबहीं कमजोर ही रहेन ठीक समइ पर हम भक्तहीनन बरे मसीह तउ आपन बलिदान दिहेस। 7अब देखा केहू धर्मी मनइयन क बरे उ केउ कठिनाइ स मरत ह। केहू धर्मी मनई क बरे आपन परान तियागइ क साहस तउ केउ कई सकत ह। 8मुला परमेस्सर तउ हमपे आपन पिरेम देखायेस। जबकि हम तउ पापी ही रहे; परन्तु ईसू त हमरे बरे परान तजि दिहेस।

9काहेकि अब जब हम ओकरे लहू क कारण धर्मी होइ ग अही तउ अब ओकरे जरिये परमेस्सर क किरोध स जरूर इ बचावा जइहीं। 10काहेकि जब हम ओकर बैरी रहे उ अपने मउत क जरिये परमेस्सर स हमार मेलमिलाप कराथेस तउ अब तउ जब ते हमार मेलमिलाप होइ चुका बा ओकरे जीवन स हमार अउ केर्तेनी जियादा रच्छा होइ। 11एँतनइ नाहीं बा हम अपने पभू ईसू मसीह क जरिये परमेस्सर क भक्ति पाइ क अब ओहमाँ आनन्द लेइत ह।

आदम अउर मसीह

12इही बरे एक मनई (आदम) जरिये जइसेन धरती पे पाप आवा अउर पाप स मउत अउ एह तरह मउत सब जने क बरे आइ काहेकि सबहिँ पाप किहे रहेन। 13अब देखा व्यवस्था क आवइ स पहिले जगत में पाप रहा परन्तु जब तक कउनउ व्यवस्था नाहीं होत कउनो क पाप नाहीं गिना जात 14मुला आदम स लइके मूसा क समइ तक मउत सब पर राज करत रही। मउत ओन सबहिँ प वइसे ही हावी रही जउन लोग पाप नाहीं किहे रहेन जइसे आदम प।

आदम भी वइसा ही रहा जइसा उ जउन (मसीह) क अवाई रही। 15परन्तु परमेस्सर क बरदान आदम क अपराध जइसेन नाहीं रहा काहेकि अगर उ एक मनइ क अपराध क कारण सभन लोगन क मउत भइ तउ एक मनई ईसू मसीह क करुणा क कारण परमेस्सर क अनुग्रह अउर बरदान सभन लोगन क भलाई बरे केर्तेना कछू अउर जियादा मिला बा। 16अउर इ बरदान उ पापी क जरिये लियावा गवा परिणाम क समान नाहीं बा काहेकि सजा क बरे नियाउ क आगमन एक अपराध क पाछे भवा रहा। परन्तु इ बरदान, जउन दोसमुक्ति कईती लइ जात ह, कइयउ अपराध क पाछे आइ रहा। 17अउर अगर एक मनई क उ अपराध क कारण मउत क सासन होइ गवा। तउ जउन परमेस्सर क अनुग्रह अउर ओकरे बरदान क जियादा क-जेहमें धर्मी क निवास बा उपभोग करत बाटेन उ तउ जीवन में उहइ एक मनई ईसू मसीह क जरिये अउर जियादा सासन करिहीं।

18तउ जइसेन एक अपराध क कारण सभन लोग दोसी ठहरावा गएन ओइसन ही ईसू क एक धरम क काम क जरिये सबके बरे परिणाम में अनन्त जीवन बरदान करइवाली धार्मिकता मिली। 19अउर जइसेन उ एक मनई क अपराध क कारण सब जने पापी बनाइ दीन्ह गएन वोइसहीनइ उ एक मनई क आग्या मानइ क कारण सब जने धर्मी उ बनाइ दीन्ह जइहीं। 20व्यवस्था क आगमन इही बरे भवा कि अपराध बढ़ी पावई। परन्तु जहाँ पाप बढ़ा, उहाँ परमेस्सर क अनुग्रह अउर भी जियादा बाढ़इ।

21ताकि जइसेन मउत क जरिये पाप राज्य किहेस ठीक वइसेन ही हमरे पभू ईसू मसीह क जरिये अनन्त जीवन क लियावइ बरे परमेस्सर क अनुग्रह धार्मिकता क जरिये राज्य करइ।

पाप क बरे मरा भवा मसीह में जीवित

6 तउ फिन हम का कही? का हम पापइ करत रही ताकि परमेस्सर क अनुग्रह बढ़त रहइ? 2निश्चय ही नाहीं। हम जउन पाप क बरे मर चुका अही पाप में ह कइसेन जियब? 3या का तू नाहीं जातन अहा कि हम, जे मसीह ईसू में बपतिस्मा लिहे अही, ओकरी मउत क ही बपतिस्मा लिहे अही।

4तउ ओकरी मउत में बपतिस्मा लेइ स ही हम हू ओनके साथे गाइ दीन्ह गवा रहा। ताकि जइसेन परमपिता क महिमामय सक्ति के जरिये मसीह क मरा हुवन में स जियाइ दीन्ह गवा रहा, वइसन ही हमहू एक नवा जीवन पावाह।

5काहेकि जब हम ओनके मउत में ओकरे साथे रहे अही तउ ओकरे जइसेन फिन स उत्थान में उ ओकरे साथे रहब। 6हम इ जानित ह कि हमार पुराना जीवन मसीह क साथे ही क्रूस प चढ़ाइ दीन्ह गवा रहा ताकि पापमय आत्मा नस्ट होइ जाइ। अउर हम आगे क बरे पाप क दास न बना रही। 7काहेकि जउन मर गवा उ पाप क बन्धन स छुटकारा पाइ गवा।

8अउर काहेकि हम मसीह क साथे मर गए, तउ हमार बिसवास बा कि हम उही क साथे जियब। 9हम जानित ह कि मसीह जेका मरा हुआ मैं स जिन्दा कीहेन रहा गवा अउर फिन नाहीं मर सकत, अमर अहइ। ओह पर मउत क बस कभउँ न चली। 10जउन मउत स उ मरा बा, उ एक बार अउर सदा रबे पाप क बरे मरा बा परन्तु जउन जीवन उ जिअत ह, उ जीवन, परमेस्सर क बरे बाटइ। 11इही तरह तू अपने बरेऊ सोचा कि तू पाप क बरे मर चुका अहा परन्तु मसीह ईसू में परमेस्सर क बरे जिअत अहा।

12इही बरे तोहर नास होइवाला सरीसन क उप्पर पाप क बस न चलइ। ताकि तू उन चीजन का गुलाम न बना जेका तोहार पातकी अहम चाहत ह। 13अपने सरीर क अंगन क अधर्म क सेवा क बरे पाप क हवाले न कर बल्कि मरा हुवन में स जी उठइवालन क समान परमेस्सर क हवाले कइ द्या। अउ अपने सरीर क अंगन क धार्मिकता क सेवा क साधन क रूप में परमेस्सर क हवाले कइ द्या।

14तोह पे पाप क सासन न होइ काहेकि तू व्यवस्था क सहारे नाहीं जिअत अहा बल्कि परमेस्सर क अनुग्रह क सहारे जिअत अहा।

धार्मिकता क सेवक

15तउ हम का करी? का हम पाप करी? काहेकि हम व्यवस्था क अधीन नाहीं, बल्कि परमेस्सर क अनुग्रह क अधीन जिअत अही। निश्चय ही नाहीं। 16का तू नाहीं जानत अहा कि जब तू कीहीउ क आज्ञा मानइ क बरे अपने आप क दास क रूप में ओका सँउपि देत ह तउ तू दास अहा।

उ मनई जेकर आज्ञा मानत अहा तोहार स्वामी अहइ! या परमेस्सर क आज्ञा भावा। पाप स आध्यात्मिक मउत होत ह। मुला परमेस्सर क हुकुम मानइ स नेकी कइँती लइ जात ह। फिन चाहे तू पाप क दास बना। 17परन्तु पभू क धन्यवाद बा कि यद्यपि तू पाप क दास रह्या, तू अपने मन स ओन्हन उपदेसन क रीति क मान्या जउन तोहे सौपा गवा रहेन। 18तोहे पाप स छुटकारा मिलि गवा अउ तू धार्मिकता क सेवक बन गया। 19(मईँ एक ठु मानवीय उदाहरण देइत ह जेका सभन लोग समाझि सकइँ काहेकि ओका समझब तू लोगन क बरे कठिन बा।) काहेकि तू अपने सरीर क अंगन क अपवितर अउ व्यवस्थाहीनता क आगे ओनके दास क रूप में सौप दिहे रह्या जैसे व्यवस्थाहीनता पैदा भई, अब तू लोग ठीक वइसेन ही अपने सरीर क अंगन क दास क रूप में धार्मिकतइ क हाथन में सौप द्या ताकि कुल समर्पण पैदा होइ।

20काहेकि तू जब पाप क दास रह्या तउ धार्मिकता कइँती स तोहे प कउनउ बन्धन नाहीं रहा। 21अउर देखा ओह समइ तोहे कइसेन फल मिला? जेकरे बरे आजु तू सर्मिन्दा अहा। जेकर अन्तिम परिणाम मउत बा। 22परन्तु अब तोहे पाप स छुटकारा मिलि चुका बा अउ परमेस्सर क दास बनाइ दीन्ह अहा गवा अहा तउ जउन खेती तू काटत अहा, तोहे परमेस्सर क बरे कुल समर्पण में लइ जाइ। जेकर अन्तिम परिणाम बा अनन्त जीवन। 23काहेकि पाप क मूल्य तो बस मृत्यु ही अहइ। जबकि हमार पभू मसीह ईसू में अनन्त जीवन, परमेस्सर क सेंटमेत क बरदान बाटइ।

विवाह क दिस्तान

7 भाइयो तथा बहिनियो, का तू नाहीं जानत अहा (मईँ ओन्हन सबन स कहत अही जउन व्यवस्था क जानत हीं।) कि व्यवस्था क सासन कीहीउ मनई पे तबहिं तलक बा जब तलक उ जिअत ह? उदाहरण क बरे एक विवाहिता स्त्री अपने पति क साथे व्यवस्था क अनुसार तबहिं तलक बंधी बा जब तलक उ जिन्दा बा परन्तु अगर ओकर पति मरि जात ह तउ उ बियाह सम्बन्धी व्यवस्था स छूट जात ह।

3पति क जिअत ही अगर कीहीउ दुसरे पुरुस स सम्बन्ध जोड़त ह ओका व्यभिचारिणी कहा जात ह परन्तु अगर ओकर पुरुस मरि जात ह तउ बियाह सम्बन्धी नियम ओह पे नाहीं लागत अउ इहीं बरे अगर उ दुसरे मनई क होइ जात ह तउ उ व्यभिचारिणी नाहीं बा।

4मोरे भाइयो तथा बहिनियो, अइसन ही इ मसीह क देह क जरिये व्यवस्था के बरे तुहउँ मरि चुका अहा। इही बरे अब तुहउँ कीहीउ दुसरे स नाता जोड़ि सकत ह। ओसे जेका मरा हुवन में स पुर्नजीवित कीन्ह गवा अहइ। ताकि हम परमेस्सर क बरे करमन क अच्छी खेती कइ सकित ह। 5काहेकि जब हम मानुस सुभाव क अनुसार जिअत रहे, हमार पाप-पूर्ण वासना जउन व्यवस्था क जरिये आइ रहीं, हमारे अंगन पर हावी रहीं। ताकि हम करमन क अइसेन खेती करी जेकर अन्त आध्यात्मिक मउत में होत ह। 6परन्तु अब हमका व्यवस्था स छुटकारा दइ दीन्ह गवा

बाटइ काहेकि जउने व्यवस्था क अधीन हमका बन्दी बनावा ग रहा, हम ओकरे बरे मरि चुका आही। अउ अब पुरान लिखित व्यवस्था स नाहीं, बल्कि आत्मा क नई रीति स प्रेरित होइके हम अपने परमेस्सर क सेवा करित ह।

पाप स लड़ाई

7त फिन हम का कही? का हम कही कि व्यवस्था पाप अहइ? निश्चय ही नाहीं। जउन भी होइ, अगर व्यवस्था नाहीं होत तउ मईँ पहिचान नाहीं पाइत कि पाप का अहइ? अगर व्यवस्था न बतावत, “जउन उचित नाहीं बा लालच जिन करा तउ निश्चय ही मईँ पहिचान नाहीं पाइत कि जउन उचित इच्छा नाहीं अहइ का बा।”*

8परन्तु पाप मौका पावत ही व्यवस्था का लाभ उठावत भवा मोहमाँ गलत सबइ इच्छा क भर दिहेस जउन अनुचित बरे रहिन। 9एकसमइ मईँ बिना व्यवस्था क ही जिन्दा रहेउँ, परन्तु जब व्यवस्था क आदेस आवा तउ पाप जीवन में उभरिके आवा। 10अउर मईँ मर गएउँ। उहइ व्यवस्था क आदेस जउन जीवन देइ बरे रहा, मोरे बरे मउत लइ आवा।

11काहेकि पाप क अउसर मिलि गवा अउर उ उहइ व्यवस्था क आदेस क जरिये मोका छलेस अउर उहइ जरिये मोका मार डाएस।

12इही तरह व्यवस्था पवितर बा अउर उ आदेस पवितर, धर्मी अउर उत्तिम बा। 13तउ फिन का एकर मतलब इ बाटइ कि जउन उत्तिम बा, उहइ मेरी मउत क कारण बन गवा? निश्चय ही नाहीं। बल्कि पाप उ उत्तिम क जरिये मोरे बरे मउत क कारण एह बरे बना कि पे क पाहिचाना जाइ सकइ। अउर व्यवस्था क जरिये ओकर खौफनाक पाप क पूर्णता देखोइ दीन्ह जाइ।

मानसिक द्रव्य

14काहेकि हम जानित ह कि व्यवस्था तउ आत्मिक अहई अउर मईँ हाइ मॉस क बना भवा भौतिक मनई अहउँ जउन पाप क दासता बरे बिका भआ हउँ। 15मईँ नाहीं जानित मईँ का करत हउँ काहेकि मईँ जउन करइ चाहित हउँ नाहीं करत हउँ, बल्कि मोका उ करे पड़त ह, जैसे मईँ घिना करत हउँ। 16अउ अगर मईँ उहइ करत हउँ जउन मईँ नाहीं करइ चाहित ह तउ मईँ अंगीकार करत हउँ कि व्यवस्था उत्तम बा।

17परन्तु सही में उ मईँ नाहीं हउँ जउन इ सब कछू करत बा, बल्कि उ पाप मोरे भितरे बसा पाप बा। 18हाँ, मईँ जानित अहउँ कि मोरे में भौतिक मानुस सरीर में कउनउ अच्छी चीजे क बास नाहीं अहइ। नेकी करइ क इच्छा तउ मोहमाँ अहइ पर नेक काम मोसे नाहीं होत। 19काहेकि जउन अच्छा काम मईँ करइ चाहित ह, मईँ नाहीं करित अहउँ बल्कि जउन मईँ नाहीं करइ चाहित, उहइ सबइ मईँ खराब काम करइ नाहीं चाहित ह मईँ नाहीं करित बल्कि जउन मईँ नाहीं करइ चाहित, उहई सब खराब काम मईँ करित हउँ। 20अउर अगर मईँ उहइ काम करित ह जेका करइ नाहीं चाहित ह तउ सही में ओकर कर्ता जउन ओन्हे

करत ह, मई नाहीं हउँ, बल्कि उ पाप अहइ जउन बसा बा।

21इही बरे मई अपने में इ नियम पाइत ह कि मई जब अच्छा करइ चाहित ह, तउ अपने में बुराई क ही पाइत ह। 22आपन अन्तरात्मा में मई परमेस्सर क व्यवस्था क खुसी स मानित ह। 23पर अपने सरीर में मई एक दुसरे ही व्यवस्था का काम करित देखित ह इ मोरे चिन्तन पे सासन करइवाली व्यवस्था स युद्ध करत ह अउर मोका पाप क व्यवस्था क बन्दी बनाइ लेत ह। इ व्यवस्था मोरे सरीर में क्रिया करत रहत ह। 24मई एक अभाग्या इंसान हउँ। मोका एह सरीर स, जउन मउत क निवाला बा, ओसे छुटकारा कउन देवाई? 25परमेस्सर मोका बचइहीं। अपने पर्भू ईसू मसीह क जरिये मई परमेस्सर क धन्यवाद करित हउँ।

तउ अपने हाइ माँस क सरीर स मई पाप क व्यवस्था क गुलाम होत भए उ आपन बुद्धि स परमेस्सर क व्यवस्था क सेवक अहउँ।

आतिमा स जीवन

8 एह तरह अब ओनके बरे जउन मसीह ईसू में स्थित बाटेन ओनके बरे, कउनउ दण्ड नाहीं बा। 2काहेकि आतिमा क व्यवस्था त जउन मसीह ईसू में जीवन देत ह, मोका पाप क व्यवस्था स जउन मउत क तरफ लइ जात ह, स्वतन्त्र कई दीन्ह बा। 3जेका मूसा क उ व्यवस्था जउन मनई क भौतिक सुभाऊ क कारण कमजोर बनाइ दीन्ह गइ रही, नाहीं कई सकी ओका परमेस्सर अपने पूत क हमरेन जइसे सरीर में पठइ क जेहसे हम पाप करत ह-ओकर भौतिक देह क पापवाली बनाइ क पाप क खतम कइके पूरा किहेस। 4जेहसे कि हमरे जरिये, देहे क भौतिक पातकी अहम स नाहीं, बल्कि आतिमा क विधि स जिअत हीं व्यवस्था क जरूरत पूरी कई जाइ सकइ।

5काहेकि उ सबइ जउन अपने भौतिक मनई सुभाऊ क अनुसार जिअत हीं, ओनकर भौतिक मनई सुभाऊ क इच्छा पर टिकी रहत ह परन्तु उ जउन आतिमा क अनुसार जिअत हीं, ओनकर बुद्धि जउन आतिमा चाहत ह ओनहिन इच्छा में लगी रहत ह। 6भौतिक मनई सुभाऊ क बस में रहइवाला मने क अन्त मउत अहइ, परन्तु आतिमा क बस में रहइवाली बुद्धि क परिणाम अहइ जीवन अउ सात्ति। 7इही तहर भौतिक मनई सुभाऊ स अनुसासित मन परमेस्सर क विरोधी अहइ। काहेकि उ न तउ परमेस्सर क व्यवस्था क अधीन बा अउ न होइ सकत ह। 8अउर उ जउन भौतिक मनई सुभाऊ क अनुसार जिअत हीं परमेस्सर क खुस नाहीं कइ सकत हीं।

9परन्तु तू पचे भौतिक मनई सुभाऊ क अधीन नाहीं अहा, बल्कि आतिमा क अधीन अहा अगर सही में तोहसे परमेस्सर क आतिमा क निवास बा। परन्तु अगर कउनो में ईसू मसीह क आतिमा नाहीं बा त उ मसीह क नाहीं बा। 10दूसरे कईती अगर तोहमाँ मसीह अहइ तउ चाहे तोहरे देह पाप क बरे मरि चुकी होइ बा पवित्तर आतिमा परमेस्सर क साथे तोहे धार्मिक ठहराइ क खुद तोहरे बरे जीवन बन जात ह। 11अउर अगर उ आतिमा जे ईसू क मरे हुवन में स

जियाए रही, तोहरे भित्तर बास करत ह, तउ उ परमेस्सर जे ईसू क मरे हुवन में स जियाए रहा, तोहरे नासमान सरीरन क आपन आतिमा स जउन तोहरे ही भित्तर बसत ह, जीवन देई।

12इही बरे भाइयो तथा बहिनियो, हम पे एह भौतिक मनइ सुभाऊ तउ अहइ परन्तु अइसेन नाहीं कि हम एकरे अनुसार जिई। 13काहेकि अगर तू भौतिक मनइ सुभाव क अनुसार जीब्या तब मरब्या। अगर तू आतिमा क जरिये सरीर क व्यवहारन क अन्त कइ देब्या तउ तू जी जाब्या।

14जउन परमेस्सर क आतिमा क अनुसार चलत हीं, उ सबइ परमेस्सर क संतान अहइ। 15काहेकि उ आतिमा जउन तोहे मिली बा, तोहे फिन स दास बनिके डेराइ बरे नाहीं बा, बल्कि उ आतिमा जउन तू पाए अहा तोहे परमेस्सर क संपालित सन्तान बनावत ह। जेसे हम पुकार उठित ह, “हे अब्बा, हे परमपिता।” 16उ पवित्तर आतिमा खुद हमरे आतिमा क साथे मिलिके साच्छी देत ह कि हम परमेस्सर क सन्तान अही। 17अउ काहेकि हम ओकर सन्तान अही, हमहूँ उत्तराधिकारी अही, परमेस्सर क उत्तराधिकारी अउर मसीह क साथे हम उत्तराधिकारी अगर सही में ओकरे साथे दुःख उठावत अहीं तउ हमका ओकरे साथे महिमा मिली ही।

हमका महिमा मिले

18काहेकि मोरे बिचार में एह समइ क हमार सबइ यातना क परगट होइवाली भावी महिमा क आगे कछूउ नाहीं बा। 19काहेकि इ सृस्टि बड़ी आसा स ओह समइ क इन्तजार करत बाटइ जब परमेस्सर क संतान क परगट कीन्ह जाई। 20इ सृस्टि निःसार रही अपने इच्छा स नाहीं, बल्कि ओकरी इच्छा स जे एका एह परिवर्तन क अधीन किहेस 21कि इहउ कभउँ आपन बिनासमान होइ स छुटकारा पाइ क परमेस्सर क सन्तान क सानदार स्वतन्त्रता क आनन्द लेई।

22काहेकि हम जानित ह कि आजु तलक समूची सृस्टि प्रसव पीड़ा में कराहत अउ तड़पत रही बाटइ। 23न केवल इ सृस्टि बल्कि हमहूँ जेका आतिमा क पहिला फल मिला बा, अपने भित्तर कराहत रहे बाटेन। काहेकि हमका ओकरे जरिये पूरी तरह अपनावा जाइ क इन्तजार अहइ कि हमार देह मुक्त होइ जाइ। 24हमार उद्धार भवा बा। इही स हमरे मने में आसा बा परन्तु जब हम जेकर आसा करित ह ओका देखि लेइत ह तउ उ आसा नाहीं रहत। जउन देखात बाटइ ओकर आसा कउन कई सकत ह। 25परन्तु अगर जेका हम देखत नाहीं अही ओकर आसा करित ह तउ धीरज अउर सहनशीलता क साथे ओकर रस्ता जोहित ह।

26अइसेन ही जइसेन हम कराहत अही, आतिमा हमरे दुर्बलता में हमार सहायता करइ आवत ह काहेकि हम नाहीं जानित ह कि हम केकरे बरे पराथना करी! परन्तु आतिमा खुद अइसेन आह भरिके जेकर सबदन में जाहिर नाहीं कीन्ह जाइ सकत हमरे बरे बिनती करत ह। 27परन्तु उ जउन लोगन क दिल क देख सकत ह वह जानत ह कि आतिमा क मन्सा का अहइ। काहेकि परमेस्सर क इच्छा स ही उ परमेस्सर क पवित्तर लोग क बरे बीच बिचाऊ करत ह।

28अउर हम जानित ह कि हर परिस्थिति में उ आतिमा परमेस्सर क भक्तन क साथे मिलिके उ काम करत ह जउन भलाइ ही लियावत हीं ओन्हन सबके बरे जेका ओकरे प्रयोजन क अनुसार इ बोलावा गवा बा। 29जेका उ पहिले ही चुनेस ओनका पहिलौटी क पूत क रूप में ठहराएस ताकि बहुत स भाइयो तथा बहिनियो! में उ पहलौठी बनि सकइ। 30जेनका उ पहिले स निश्चित किहेस उहूँ क उ बोलाएस अउर जेनका उ बोलाएस, ओनका उ धर्मी ठहराएस। अउर जेका उ धर्मी ठहराएस, ओनका महिमा प्रदान किहेस।

परमेस्सर क पिरेम

31तउ एका देखत हम का कही? अगर परमेस्सर हमरे पच्छ में बा हमरे विरोध में कउन होइ सकत ह? 32उ जे अपने पूत तलक क नहीं छोड़ेस बल्कि ओका हम सबके बरे मरइ क सउँप दिहेस। उ भला हमका ओकरे साथ अउर सब कछू काहे न देई? 33परमेस्सर क चुना भवा लोगन पे अइसेन कउन बा जउन दोस लगावइ? उ परमेस्सर ही अहइ जउन ओनका धर्मी ठहराता ह? 34अइसेन कउन अहइ जउन ओका दोसी ठहरावइ? मसीह ईसू उ अहइ जउन मरि गवा अउर (इहींउँ स जियादा जरूरी इ बा कि) ओका फिन जियावा गवा। जउन परमेस्सर क दहिनी कईंती बइठा अहइ अउर हमरे कईंती स बिनती भी करत ह 35कउन अहइ जउन हमका मसीह क पियार स अलग करी? यातना या कठिनाइ या अत्याचार या अकाल या नंगापन या जोखिम या तलवार? 36जइसेन कि सास्तर कहत ह:

“तोहरे (मसीह) बरे सारा दिन हमका मउत क सौपा जात ह। हम काटी जाइवाली भेइ जइसेन समझा जात हीं।”

भजन संहिता 44:22

37तबउ ओकरे जरिये जउन हमसे पिरेम करत ह, ऐन सब बातन में हम एक सानदार विजय पावत अही। 38काहेकि मई मान चुका हउँ कि न मउत, न जीवन, न सरगदूतन अउर न सासन करइवाली आतिमन, न वर्तमान क कउनउ चीज अउर न भविस्स क कउनउ चीज, न आत्मिक सक्ति, 39न कउनउ हमरे ऊपर क, अउर न हमसे नीचे क, न सृस्टि क कउनउ अउर चीज हमका पभूँ क ओह पिरेम स, जउन हमरे भीतर पभूँ मसीह ईसू बरे बाटइ, हमका अलग कइ सकइ।

परमेस्सर अउर यहूदियन

9मसीह में मई सही कहत हउँ। मई झूठ नहीं कहित अउर मोर चेतना जउन पवित्र आतिमा क जरिये प्रकासित बा, मोरे साथ मोरे साच्छी देत ह 2कि मोका गहिर दुःख बा अउर मोरे मने में मई पीड़ा बा। 3कास मई चाहि सक्ति कि आपन भाइ-बन्धुवन अउर दुनियावी सम्बन्धन क बरे मई मसीह क साप अपने ऊपर लइ लेइत अउर ओसे अलग होइ जाइत। 4जउन इस्त्राएली बाटेन अउर जेनका परमेस्सर संपालित संतान होइ क अधिकार बा, जउन

परमेस्सर क महिमा क दरसन कइ चुका बाटेन, जउन परमेस्सर क करार क भागीदारे अहई। जेनका मूसा क व्यवस्था, सच्ची आराधना अउर बचन प्रदान कीन्ह गवा बा। 5पूर्वजन उहीं स सम्बन्ध रखत ह अउर मनई सरीर क दिस्टी स मसीह उहीं में पइदा भवा जउन सबक परमेस्सर अहइ अउर हमेसा धन्य बा। आमीन!

6अइसेन नहीं बा कि परमेस्सर आपन बचन पूरा नहीं किहे बा काहेकि जउन इस्त्राएल क बंसज बाटेन उ सभन इस्त्राएली नहीं अहई। 7अउर न तउ इब्राहीम क बंसज होइ क कारण उ सब सच्चाइ-मुच्चइ इब्राहीम क संतान अहई। बल्कि (जइसेन परमेस्सर कहेस) “तोहार बंसज इसहाक क द्वारा आपन परम्परा बढ़ावई।”* 8मतलब इ नहीं अहइ कि प्राकृतिक तउर पे सरीर स पैदा होइवाला बच्चा परमेस्सर क बंसज अहइ, बल्कि परमेस्सर क बचन स प्रेरित होइवाले ओनकर बंसज माना जात हीं।

9बचन एह तरह कहा गवा रहा: “निश्चित समइ पे मई लउटब अउर सारा पुत्रवती होई।”*

10ऐतनइ नहीं जब रिबका भी एक मनई, हमार पहिले क पिता इसहाक स गर्भवती भइ 11-12त बेटवन क पैदा होइ स पहिले अउर ओकरे कछू भला बुरा करइ स पहिले कहा गवा रहा जेहसे परमेस्सर क उ प्रयोजन सिद्ध होइ जउन चुनाव स सिद्ध होइ। अउर जउन मनईक क करमन पे नहीं टिका बल्कि उ परमेस्सर पे टिका बा जउन बोलावइवाला अहइ। रिबका स कहा गवा बा, “बड़का बेटवा छोटे बेटवा क सेवा करी।”* 13पवित्र सास्तर कहत ह, “मई याकूब क चुनउँ अउर एसाव क नकार दिहेउँ।”*

14तउ फिन हम का कही? का परमेस्सर अन्यायी बा? 15निश्चय ही नहीं। काहेकि परमेस्सर मूसा स कहे रहा, “मई जउन कउनो पे उ दया करइ क सोचब, दया देखाउब। अउ जउन कउनो पे उ अनुग्रह करइ चाहब, अनुग्रह करब।”* 16इही बरे न तउ कउनउ क इच्छा अउर प्रयास बल्कि दयालु परमेस्सर पे निर्भर करत ह। 17काहेकि सास्तर में परमेस्सर तउ फिरौन स कहे रहा: “मई तोहका इही बरे खड़ा किहे रहेउँ कि मई आपन सक्ति तोहमें देखाइ सकी। अउर मोर नाउँ समूची धरती पे घोसित कीन्ह जाइ।”* 18तउ परमेस्सर जेहका चाहत ह दया करत ह अउ जेका चाहत ह कठोर बनाइ देत ह।

19तउ फिन तू सायद मोसे कहया, “अगर हमरे करमन क नियन्त्रण करइवाला परमेस्सर बा त फिन उ ओहमों हमार दोस काहे समझत ह?” आखिरकार ओकरी इच्छा क विरोध कउन कइ सकत ह? 20अरे मनई तू कउन होत अहा जे परमेस्सर क उलटि के उत्तर देइ? का कउनउ रचना

“तोहर ... बढ़ावई” उत्पत्ति 21:12

“निश्चित ... होई” उत्पत्ति 18:10, 14

“बड़का ... करी” उत्पत्ति 25:23

मई ... दिहेउँ मलाकी 1:2-3

“मई ... करब” निर्गमन 33:19

“मई ... जाई” निर्गमन 9:16

अपने रचइवालन स पूछ सकत ह कि “तू मोका अइसेन काहे बनाया?” 21का कीहीउ कोहार क मिट्टी पे इ अधिकार नाहीं बा कि उ कीहीऊँ एक लँऊदा स एक भाँड बिसेस प्रयोजन बरे अउ दूसर हीन प्रयोजन बरे बनावइ?

22परन्तु एहमाँ का बा अगर परमेस्सर त आपन किरोध देखॉवइ अउर आपन सक्ति जतावइ क बरे ओन्हन भाँडन क जउन किरोध क पात्र रहेन अउर जेकरे बिनास होइ क रहा, बड़ा धीरज क साथे सही, 23उ ओनकइ सहेस ताकि उ भाँडन क लाभ बरे जउन दया क पात्र रहेन अउर जे उ आपन महिमा पावइ बरे बनाए रहा, ओह पे आपन महिमा परगट कइ सकइ। 24मतलब हम जेका उ न केवल यहूदियन में स बोलाएस बल्कि गौर यहूदियन में स भी 25जइसेन कि होसे क किताबे में लिखा बा:

“जउन लोग मोर लोग नाहीं रहे ओन्हे मई आपन कहवइ। अउर उ स्त्री जउन पिआरी नाहीं कही गइ मई ओका प्रिया कहवइ।” होसे: 2:23

26“अउर इ उहइ घटी जउने स्थान पे ओनसे कहा गवा रहा, ‘तू पचे मोर परजा नाहीं अहा।’ उहइ उ जिन्दा परमेस्सर क सन्तान कहवइहीं।” होसे: 1:10

27अउर यसायाह इस्त्राएल क बारे में पुकार क कहत ह।

“यद्यपि इस्त्राएल क सन्तान समुद्र क बालू क कणन क समान असंख्या अहई तऊँ ओहमाँ स केवल थोड़ क ही बच पइहीं। 28काहेकि पर्भू पृथ्वी पे आपन निआव क पूरी तरह स अउ जल्दी ही पूरा करी।”*

29अउ जइसेन कि यसायाह त भविस्सबाणी किहे रहा:

“अगर सर्वसक्तिमान पर्भू हमरे बरे बंसज न छोड़तेन त हम सदोम जइसे अउर अमोरा जइसे ही होइ जाइत।”*

30त फिन हम का कही? हम इ नतीजा पे पहुँच अही कि गौर यहूदियन क लोग जउन धार्मिकता क खोज में नाहीं रहेन, उ धार्मिकता क पाइ गएन। उ पचे जउन बिसवास क कारण ही धार्मिक ठहरावा गएन। 31परन्तु इस्त्राएल क लोग तउ जउन जइसेन व्यवस्था पे चलइ चाहत रहेन जउन ओनका धार्मिक ठहरावत ओकरे अनुसार नाहीं जी सकेन। 32काहे नाहीं? काहेकि उ पचे एकर पालन बिसवास स नाहीं, बल्कि अपने करमन स धर्मी बना चाहत रहेन, उ सबइ ओह चट्टान पे ठोकर खाइ गएन, जउन ठोकर दियावत रही। 33जइसेन कि पवितर सास्तर कहत ह:

“देखा, मई सिथ्योन में एक पत्थर रखत हई जउन ठोकर दियावत ह अउर एक चट्टान जउन पाप करावत ह। परन्तु उ जउन ओहमाँ बिसवास करत ह, ओका कभई निरास न होइ क होई।” यसायाह 8:14; 28:16

10 भाइयो तथा बहिनियो, मोरे हीये क इच्छा बा अउर मई परमेस्सर स ओन्हन सबके बरे पराथना करत हई कि ओनकर उद्धार होइ जाइ। 2काहेकि मई साच्छी देत

हई कि ओहमाँ परमेस्सर क धुन बा। परन्तु उ ज्ञान पे नाहीं टिकी बा 3काहेकि उ पचे उ धार्मिकता क नाहीं जानत रहेन जउन परमेस्सर स मिलत अहइ। अउर उ सबइ आपन निजी धार्मिकता क स्थापना क जतन करत रहेन। तउ उ परमेस्सर क धार्मिकता क नाहीं स्वीकारेन।

4मसीह व्यवस्था क अन्त किहेस ताकि हर कउनो क जउन बिसवास करत ह, उ परमेस्सर बरे धार्मिक होइ जाइ।

5धार्मिकता क बारे में जउन व्यवस्था स मिलत ह, मूसा लिखे बाटइ, “जउन व्यवस्था पे चली, उ ओनके कारण जिन्दा रही।”* 6परन्तु बिसवास स मिलइवाली धार्मिकता क बारे में पवितर सास्तर इ कहत ह, “तू अपने स इ न पूछा, ‘सरगे में ऊप्पर कउन जाई?’” (यानि “मसीह क नीचे धरती पे लियावइ।”) 7“या, ‘नीचे अधोलोक में कउन जाई?’” (यानि “मसीह क मरा हुवन में स ऊपर लियावइ।”)

8पवितर सास्तर इ कहत ह: “बचन तोहरे लगे बा, तोहरे ओठन पे बा अउर तोहरे मने में बा।”* यानि बिसवास क वह बचन जेकर हम प्रचार करत अही, 9कि अगर तू अपने मुँहे स घोसित करा, “ईसू मसीह पर्भू अहइ”, अउर तू अपने मने में इ बिसवास करा कि परमेस्सर तउ ओका मरा हुवन में स जिन्दा किहेस तउ तोहार उद्धार होइ जाई। 10काहेकि अपने हृदय क बिसवास स मनई धार्मिक ठहरावा जात ह अउर अपने मुँहे स ओकरे बिसवास क स्वीकार करइ स ओकर उद्धार होत ह। 11पवितर सास्तर कहत ह, “जउन केऊ ओहमाँ बिसवास रखत ह ओका निरास न होइ पड़ी।”* 12इ एह बरे बा कि यहूदी अउर गौर यहूदी में कउनउ भेद नाहीं काहेकि सब क पर्भू तउ एककइ अहइ। अउर ओकर दया ओन्हन सब क बरे, देत ह जउन ओकर नाउँ लेत हीं, अपरम्पार बा। 13पवितर सास्तर कहत ह, “हर केऊ जउन पर्भू क नाउँ लेत हीं, उद्धार पइहीं।”*

14परन्तु उ सबइ जउन ओहमाँ बिसवास नाहीं करतेन, ओकर नाउँ कइसे पुकरिहीं? अउर उ पचे जउन ओकरे बारे में सुनेन नाहीं, ओहे में बिसवास कइसे कइ पइहीं? अउर फिन भला जब तलक केऊ ओनका उपदेस देइवाला न होइ, उ पचे कइसे सुन सकिहीं? 15अउ उपदेसक तब तलक उपदेस कइसे दइ पइहीं? जब तलक ओनका भेजा न गवा होइ? जइसेन कि पवितर सास्तर में कहा बा, “सुसमाचार लियावइ वालन क चरण केतना सुन्दर बाटेन।”*

16परन्तु सब सुसमाचार क स्वीकार करेन नाहीं। यसायाह कहत ह, “पर्भू हमरे उपदेस क कउन स्वीकार किहेस?”*

17तउ सुसमाचार क सुनइ स बिसवास उपजत ह अउर सुसमाचार तब सुना जात ह जब केऊँ मसीह क बारे में उपदेस देत ह।

“जउन ... रही” लैव्य : 18:5

पद 6-8 व्यवस्था 30:12-14

“जउन ... पड़ी” यसा: 28:16

“हर ... पइहीं” योए: 2:23

“सुसमाचार ... बाटेन” यसा: 52:7

“पर्भू ... किहेस” यसा: 53:1

“यद्यपि ... करी” यसा: 10:22-23

“अगर ... जाइत” यसा: 1:9

18परन्तु मई कहत हउँ, “का उ पचे हमरे सुसमाचार क नाहीं सुनेन?” हौं निश्चय ही। पवितर सास्तर कहत हः

“ओनकर स्वर समूचा धरती पे फइल गवा अउर ओनकर बचन जगत क एक छोर स दुसरे छोर तलक पहुँचैन।”

भजन संहिता 19:4

19परन्तु मई पूछित हउँ कि, “का इस्त्राएली नाहीं समझत रहेन?” मूसा कहत हः

“पहिले मई तू लोगन क मन मँ अइसेन लोगन क दूवारा जउन सही मँ कउनउ जाति नाहीं अहइ, डाह पैदा करब। मई उ रास्ट्र, जो समझत नाहीं, तोहे किरोध दियाउब।”

व्यवस्था विवरण 32:21

20फिन यसायाह साहस क साथ कहत हः

“मोका ओन्हन सब पाइ लिहेन जउन मोका नाहीं खोजत रहेन। मई ओनक्के बरे परगट होइ गएउँ। जउन मोर खोज खबर मँ नहीं रहेन।”

यसायाह 65:1

21परन्तु परमेस्सर इस्त्राएलियन क बारे मँ कहत रहा, “मई सब दिना आज्ञा न मानइवालन अउर अपने बिरोधियन क आगे हाथ फइलाए रहेउँ।”*

परमेस्सर अपने लोगन क नाहीं भूला

11 तउ मई पूछित हउँ, “का परमेस्सर अपने ही लोगन क नकार नाहीं दिहेस?” निश्चय ही नाहीं। काहेकि मई भी एक इस्त्राएली हउँ, इब्राहीम क बंस स अउर बिन्यामीन क परिवार स हउँ। 2परमेस्सर अपने लोगन क नाहीं नकारेस जेनका उ पहिलेन स ही चुने रहा। या अउर का तू नाहीं जानत अहा कि एलिय्याह क बारे मँ पवितर सास्तर का कहत ह। जब एलिय्याह परमेस्सर स इस्त्राएल क लोगन क विरोध मँ पराथना करत रहा? 3“हे पभूँ उ पचे नबियन क मार डाएन। तोहरे वेदियन क तोड़ी क गिराइ दिहेन। केवल एक नबी मई ही बचा हउँ अउर उ पचे मोका भी मारि डावइ क जतन करत अहइँ।”* 4परन्तु तब परमेस्सर ओन्हे कइसेन उत्तर दिहे रहा, “मई अपने बरे 7,000 लोग बचाइ रखे हउँ जउन लोग बाल क आगे माथा नाहीं टेकेन।”* 5तउन वइसेन ही आजु काल्हिउ कछू अइसेन लोग बचा बाटेन जउन ओनके अनुग्रह क कारण चुना भआ अहइँ। 6अउर अगर इ परमेस्सर क अनुग्रह क परिणाम अहइ तउ लोग जउन करम करत हीं, इ ओन्हन करमन क परिणाम नाहीं बा। नाहीं तउ परमेस्सर क अनुग्रह, अनुग्रह ही नाहीं ठहरत।

“मई ... रहेउँ” यसा: 65:2

“हे पभूँ ... अहइँ” 1 राजा: 19:10; 14

“मई ... नाहीं टेकेन” 1 राजा: 19:18

7तउ ऐहसे का? इस्त्राएल क लोग जेका खोजत रहन, उ सबइ ओका नाहीं पाइ सकेन। परन्तु चुना हुवन क उ मिलि गवा। जब कि बाकी सब क जइ बनाइ दीन्ह गवा। 8पवितर सास्तरन कहत हः

“परमेस्सर तउ ओन्हे एक चेतन सूय कइ दिहेस आतिमा प्रदान किहेस।”

यसायाह 29:10

“अइसेन आँखी दिहेस जउन देखि नाहीं सकत रहिन अउ अइसेन कान दिहेस जउन सुन नाहीं सकत रहेन। अउर इहइ दसा ठीक आजु तलक बनी भई बा।”

व्यवस्था विवरण 29:4

9दाऊद कहत हः

“अपनेन भोगन मँ फंसके उ बन्दी बन जाइँ ओनकर पतन होइ अउ ओनका दण्ड मिलइ।

10ओनकर आँखी धुँधली होइ जाइँ ताकि उ पचे देख न सकइँ अउ तू ओनकर सब पीड़ाके तले, ओनकर करिहाउँ हमेसा-हमेसा निहुराए रखइ।”

भजन संहिता 69:22-23

11तउ मई कहत हउँ का ओ पचे इही बरे ठोकर खाइके उ सब भहराइके नस्ट होइ जाइँ? निश्चय ही नाहीं। बल्कि ओनकर गलती करइ स गैर यहूदियन क छुटकारा मिला ताकि यहूदियन मँ स्पद्धा पैदा होइ। 12इही तरह अगर ओनकर गलती करइ क मतलब समूचइ संसार क बड़ा लाभ अहइ अउ अगर ओनके भटकइ स गैर यहूदियन क लाभ अहइ तउ ओनकइ पूरी तरह स संपूर्ण होए स बहुत कछू होइ।

13इ अब मई तोहसे कहत हउँ, जउन यहूदियन नाहीं होइँ काहेकि मई विसेस रूप स गैर यहूदियन क बरे प्रेरित हउँ, मई अपने काम क बरे पूरा प्रयत्नशील हउँ। 14एह आसा स कि मई अपने लोगन मँ भी स्पद्धा जगाइ सकउँ अउ ओहमाँ स कछू क उद्धार करउँ। 15काहेकि अगर परमेस्सर क द्वार ओनके नकार दिहे जाइ स जगत मँ परमेस्सर क साथे मेलमिलाप पैदा होत ह तउ फिन ओनकर अपनावा जाब का मरा हुवन मँ स जियावा जाब न होइ?

16अगर हमरी भेंट का एक पहला हिस्सा पवितर बा तउ का उ समूचइ पवितर नाहीं बा? अगर पेड़ का जइ पवितर बा तउ ओकर सबइ साखा भी पवितर बाटिन।

17परन्तु अगर कछू साखा तोड़िके फेक दीन्ह गइन अउ तू जउन एक जंगली जैतून क टहनी अहा ओह पे पेबन्द चढ़ाइ दीन्ह जाइ अउ उ जैतून क अच्छा पेड़ का खुराक अउर आधार क हिस्सा बाँटइ लगइ। तू सबइ गैर यहूदियन जंगली साखा क तरह अहा अउर तू पचे पहिले पेड़ (यहूदी) क खुराक अउर जीवन बाँटत अहा। 18तउ तोहे ओन्हन टहनियन क आगे, जउन तोड़ी क फेंक दीन्ह गइन, अभिमान न करइ चाही। अउर अगर तू अभिमान करत ह तउ इ याद रखा इ तू नाहीं अहा जे जइन क पालत बा, बल्कि इ तउ उ जइ ही अहइ जउन तोहे पालत बाटइ। 19अब तू कहब्या, “हौं परन्तु सबइ साखा एह बरे तोड़ी गई

कि मोर पेबन्द चढ़इ।” 20इ सत्य अहइ, उ सबइ अपने अबिसवास क कारण तोड़िके फेंक गइन परन्तु तू अपने बिसवास क बल पे आपन जगह टिका रह्या। इही बरे एकर गर्ब न करा बल्कि डेरात रहा। 21अगर परमेस्सर प्राकृतिक डारन नाहीं रहइ दिहेस तउ उ तोहका भी न रहइ देइ।

22इही बरे तू परमेस्सर क कोमलता क देखा, अउर ओकरे कठोरता प धियान द्या। इ कठोरता ओनके बरे बा जउन गिर गएन परन्तु ओकर करुणा तोहरे बरे बा अगर तू अपने पे ओकर अनुग्रह बना रहइ द्या। नाहीं तउ पेड़े स तुहउँ काटिके फेंका जाव्या। 23अउर अगर उ पचे अपने अबिसवास में नाहीं रहेन तउ ओनहूँ फिन पेड़ स जोड़ लीन्ह जाइ काहेकि परमेस्सर समर्थ अहइ कि ओनका फिन स जोड़ देइ। 24जब तोहे प्राकृतिक रूप स जंगली जैतून क पेड़े स एक साखा क तरह कटके प्रकृति क विरुद्ध एक अच्छा जैतून क पेड़े स जोड़ दीन्ह गवा, तउ इ जउन ओह पेड़े क अपना डारिन बाटिन, अपनेन ही पेड़ में आसानी स, फिन स काहे नाहीं जोड़ दीन्ह जा इहीं।

25भाइयो तथा बहिनियो, मई तोहे इ छुपा हुआ सत्य स अंजान नाही रखइ चाहित। कि तू अपने आप क बुद्धिमान समझइ लाग्ग। कि इस्राएल क कछू लोग अइसेन ही कठोर बनाइ दीन्ह गवा बाटेन। अउर अइसेनइ ही कठोर बना रहहीं जब तलक कि काफी गैर यहूदी लोग परमेस्सर क परिवार क अंग नाहीं बन जातेन। 26अउर एह तरह समूचा इस्राएल क उद्धार होइ जइसेन कि पवित्र सास्तरन कहत ह:

“उद्धारकर्ता सिंथोन स आइ। उ याकूब क परिवार स सबहिन बुराइयन क दूर करी।

27मोर इ करार ओकरे साथे तब होइ जब मई ओनके पापन के हर लेबा।”

यसायाह 59:20-21; 27:9

28जहाँ तलक सुसमाचार क सम्बन्ध बा, उ तोहरे हिते में परमेस्सर क सन्तु अहई। परन्तु जहाँ तलक परमेस्सर क जरिये ओनके चुना जाइ क सम्बन्ध अहइ, उ पचे ओनके पूर्वजन क दिए भए बचन क अनुसार परमेस्सर क पियारा अहई। 29काहेकि परमेस्सर जेका बोलावत ह अउर जेका उ देत ह, ओकरे तरफ स अपन मन कभउँ नाहीं बदलत। 30काहेकि जइसेन तू लोग पहिले कभउँ परमेस्सर क आज्ञा नाहीं मानत रह्या परन्तु अब तोहे ओकर अवज्ञा क कारण परमेस्सर क दया मिली बा। 31वइसेन ही अब उ पचे ओकर आज्ञा नाहीं मानतेन काहेकि परमेस्सर क दया तोहे पे बा ताकि अब ओन्हे भी परमेस्सर क दया मिलइ। 32काहेकि परमेस्सर सब जने के अवज्ञा क कारागार में इही बरे डारि रखे अहइ कि उ ओन सब पर दया देखॉय सकइ।

परमेस्सर धन्य अहइ

33परमेस्सर क करुणा, बुद्धि अउर ज्ञान केतौना अपरम्पार अहइ। ओकरे निआव केतौना गहन बा, ओकर रस्ता केतना गूढ़ बा। 34पवित्र सास्तर कहत ह:

“पभू क मने क कउन जानत ह? अउर ओका सलाह देइवाला कउन होइ सकत ह?”

यसायाह 40:13

35“परमेस्सर क केऊ का दिहे अहइ कि उ कउनो क ओकरे बदले कछू देइ।”

अय्यूब 41:11

36काहेकि सब क रचनावाला उहइ बा। उही स सब स्थिर बाटेन अउर उ उही क बरे बा। ओकर हमेसा महिमा होइ। आमीन।

आपन जीवन पभू क अरपन करा

12 इही बरे भाइयो तथा बहिनियो, परमेस्सर क दया क याद देवाइके मई तोहसे आग्रह करत हउँ कि अपने जीवन क एक ठु जिन्दा बलिदान क रूप में परमेस्सर को प्रसन्न करत भए अर्पित कइ दया। इ तोहार आत्मिक आराधना अहइ जेसे तू सबन क ओका चुकावइ क होइ। 2अब अउर आगे इ दुनिया क रीति पे जिन चला बल्कि अपने मने क नवा कइके अपने आप क बदल डावा ताकि तू सबन क पता चलि जाइ कि परमेस्सर तू पचन क बरे का चाहत ह। यानि जउन उत्तिम बा, जे ओका भावत ह अउर जउन सम्पूर्ण बा।

3इही बरे ओकरे अनुग्रह क कारण जउन उपहार उ मोका दिहे अहइ, ओका धियान में रखत हुए मई तोहमें स हर एक स कहत हउँ, अपने क जइसेन यथा उचित समझा मतलब जेतना बिसवास उ तोहे दिहे अहइ, उही क अनुसार अपने को समझइ चाही। 4काहेकि जइसेन हम पचन में स हर एक क सरीर में बहुत स अंग बाटेन। चाहे सब अंगन क काम एक जइसेन नाहीं बाटेन। 5हम अनेक अही परन्तु मसीह में हम एक देहे क रूप में होइ जाइत ह। एह तरह हर एक अंग हर दुसरे अंग स जुड़ जात ह। 6तउ फिन ओकरे अनुग्रह क अनुसार हमका जउन अलग-अलग उपहार मिला बाटेन, हम ओनकर प्रयोग करी। अगर कउनो क भविष्यबाणी क छमता दीन्ह गइ तो ओहका इस्तेमाल कइ देइ, ओकरे बिसवास क आधार पर। 7अगर कउनो क सेवा करइ क उपहार मिला बा तउ अपने आप क सेवा क बरे अर्पित करइ, अगर कउनो क उपदेस का उपहार मिला बा तउ ओका उपदेस क प्रचार में लगावइ चाही। 8अगर केऊ सलाह देइ क अहइ तउ ओका सलाह देइ चाही। अगर कउनो क दान देइ क उपहार मिला बा तउ ओका मुक्त भाउ स दान देइ चाही। अगर कउनो क अगुआई करइ क उपहार मिलत ह तउ लोगन क साथ अगुआई करइ। जेका दया देखावइ क मिली बा, उ खुसी स दया करइ।

9तोहार पियरेम सच्चा होइ। बदि स घिना करा। नेकी स जुड़ा। 10भाइचारे क साथ एक दूसरे क बरे समर्पित रहा। आपस में एक दुसरे क आदर क साथे अपने स जियादा महत्व द्या। 11उत्साही बना, आलसी नाहीं, आत्मा क तेज स चमका। पभू क सेवा करा। 12अपने आसा में खुस रहा। विपति में धीरज धरा। निरन्तर पराथना करत रहा। 13परमेस्सर

क जनन क जरूरतन में हाथ बटावा। अतिथि सत्कार क अउसर ढूँढत रहा।

14जउन तू सबन क सतावत होई ओन्हे आसीबादि द्या, ओन्हे साप न द्या, आसीबादि द्या। 15जउन खुस अहई ओनके साथे खुस रहा। जउन दुखी अहई, ओनके दुखे में दुखी हवा। 16मेल मिलाप स रहा। अभिमान न करा बल्कि दीनन क संगत करा। अपने क बुद्धिमान न समझा।

17बुराइ क बदला बुराइ स कउनो क न द्या। सभन लोगन क आँखी में जउन अच्छा होइ उही क करइके सोचा। 18जहाँ तक तोहसे बन पड़इ सब मनइयन क साथे सान्ति स रहा। 19कउनो स अपने आप बदला न ल्या। पियारे बन्धुओ, बल्कि एका परमेस्सर क किरोध पे छोड़ द्या काहेकि सास्तर में लिखा बा: “पभू कहेस ह बदला लेब मोर काम बा। प्रतिदान मई देबइ।” * 20“बल्कि तू अगर तोहर दुस्मन भूखा बा तउ ओका भोजन करावा, अगर उ पियासा अहइ तउ ओका पीअइके द्या। काहेकि अगर तू अइसेन करत ह तउ उ तोहसे सर्मिन्दा होई।” * 21बदी स न हारा बल्कि अपने नेकी स बदी क हराइ द्या।

सरकारी सासक क नेमन क पालन करा

13 हर मनई क प्रधान सत्ता क अधीनता अंगीकार करइ चाही। काहेकि सासन क अधिकार परमेस्सर कइँती स बा। अउर जउन अधिकार मौजूद बा ओन्हे परमेस्सर नियत किहे बा। 2इही बरे जउन सत्ता क विरोध करत हीं, उ परमेस्सर क आज्ञा क विरोध करत ह अउर जउन परमेस्सर क आज्ञा क विरोध करत हीं, उ दण्ड पइहीं। 3अब देखा कउनउ सासक, उ मनई क, जउन नेकी करत हीं, नाहीं डेरातेन बल्कि उही क डेरावत हीं, जउन खराब काम करत हीं। अगर तू सासन स नाहीं डेराइ चाहत ह, तउ भला काम करत रहा। तोहे सत्ता क प्रसंसा मिली। 4जउन सासन में अहई उ परमेस्सर क सेवक अहई उ तोहर भला करइ बरे बा। परन्तु अगर तू खराब करत ह तउ ओहसे डेरा काहे? काहेकि ओकर तलवार बेकार नाहीं बाटइ। उ परमेस्सर का सेवक अहइ अउर जो गलत करत ह, वह परमेस्सर क क्रोध लिआवत ह। 5इही बरे समर्पण जरूरी बा। न केवल डर क कारण बल्कि तोहरे अपने चेतना क कारण

6इही बरे त तू पचे चुंगी (टिक्स) चुकावत ह काहेकि अधिकारी परमेस्सर क सेवक बाटेन जउन अपने कर्तव्यन क ही पूरा करइ में लगा रहत हीं। 7जेह कउनो क तोहका देइ क बा, ओका चुकाइ द्या। जउन कर तोहका देइ क बा। ओका द्या जेकर चुंगी (टिक्स) तोहपे निकरत ह, ओका चुंगी द्या। जेहसे तोहे डेराइ चाही, तू ओसे डेरा। जेकर आदर करइ चाही ओकर आदर करा।

पिरेम इ व्यवस्था अहइ

8आपसी पिरेम क अलावा कउनो क ऋण अपने उप्पर

न रखा काहेकि जउन अपने साथियन स पिरेम करत ह, उ एह तरह व्यवस्था क पूरी आज्ञा क मानत ह। 9मई इ एह बरे कहत हउँ काहेकि, “व्यभिचार न करा, हतिया न करा, चोरी न करा, लालच न रखा” * अउ जउनउ दूपरी व्यवस्था होइ सकत ह, इ बचन में समाइ जात ह कि, “तोहे अपने साथी क अइसेन ही पियार करइ चाही, जइसेन तू अपने आप क करत ह।” *

10पिरेम अपने साथी क बुरा कभउँ नाहीं करत। इही बरे पिरेम करब व्यवस्था क पूरा करब बा।

11इ सब कछू त एह बरे करा कि जइसेन समइ में तू रहत ह, ओका जानत अहा। तू जानत अहा कि तोहरे बरे संकट का समइ अहइ अपने नींद स जगावइ क समइ आइ पहुँचा बा, उ समय क तुलना में जब हम पहले बिसवास धारण किहे रहने तउ हमार उद्धार अब ओसे जियादा लगे बा।

12“रात” लगभग पूरी होइ चुकी बा, “दिन” लगे ही बा, इही बरे आवा हम ओन्हन करमन स छुटकारा पाइ लेइ जउन अन्धकार क अहई। आवा हम प्रकास क अस्त्रन क धारण करी। 13आवा हम वइसेन ही अच्छे रीति स रही जइसेन दिन क समइ दिन रहत ह। बहुत जियादा बेमार क दावत में न जात भए खाइ पीइके बुत न होइ जा। लुच्चापना दुराचार व्यभिचार में न पड़ा। न झगड़ा अउर न ही डह रखा। 14बल्कि पभू ईसू मसीह

क धारण करा। अउर आपन भौतिक मनई सुभाउ क सबइ इच्छा क पूरा करइ में ही न लगा रहा।

दुसर में दोस न निका

14 जेकर बिसवास कमजोर बा, ओकर भी स्वागत करा परन्तु वाद विवाद करइके बरे नाहीं। 2केउ मानत ह कि उ सब कछू खाइ सकत ह, परन्तु कउनउ कमजोर मनई बस साग-पात इ खात ह। 3जउन हर तरह का खाना खात ह, ओका उ मनइयन क हीन न समझइ चाही जउन कछू चीज नाहीं खातेन अइसेन ही वह जो कछू वस्तुअन नाहीं खात ह, ओका सब कछू खाइवाले क बुरा नाहीं कहइ चाही। काहेकि परमेस्सर उस मनई को स्वीकार कइ लिहे बा। 4तू कउनो दूसर घरे क दास प दोस लगावइ वाला कउन होत हया? ओकर अनुमोदन या ओका अनुचित ठहरावइ स्वामी पे उ निर्भर करत ह। उ अवलम्बित रही। काहेकि ओका पभू तउ अवलम्बित होइके टिका रहइ क सक्ति दिहेस।

5अउर फिन कउनउ कीहीउ एक दिन क सब दिना स अच्छा मानत हीं अउर दुसर ओका सब दिनन क बराबर मानत हीं तउ हर कउनो क पूरी तरह अपनी दृढ़ धारणा पर निश्चित रहइ चाही। 6जउन कउनो उ विसेख दिन क मानत हीं उ ओका पभू क आदर देइ क बरे ही मानत ह। अउर जे सब कछू खात ह उहइ पभू क आदर देइ क बरे ही

“पभू ... देबइ” व्यवस्था 32:35

“बल्कि ... होई” नीति: 25:21-22

“व्यभिचार ... रखा” निर्ग: 20:13-15, 17

“तोहे ... करत ह” लैव्य: 19:18

खात ह। काहेकि परमेस्सर क धन्यवाद करत ह। अउर जे कीहीउ चीजन क नाहीं खात, उहउ अइसेन इही बरे नाहीं करत ह काहेकि उहउ पभू क ही आदर देइ चाहत ह। उ भी परमेस्सर क ही धन्यवाद देत ह।

7हम पचन में स कउनउ भी न तउ अपने बरे जिअत ह, अउर न अपने बरे मरत ह। 8हम जिअत ह तउ पभू क बरे अउर अगर मरित ह तउ पभू क बरे। तउन चाहे हम जिई चाहे मरी, हम हई तउ पभू क ही। 9इही बरे मसीह मरा, अउर इही बरे जी उठा ताकि उ, उ जउन अब मरि चुका अहइ, अउर जउन जीवित अहइ दुइनउँ क पभू होइ सकइ। 10तउन तू अपने बिसवास में टिका भवा अपने भाइ पे दोस काहे लगावत ह? या तू अपने बिसवास में कमजोर भाई क हीन काहे मानत ह? हम सभन क परमेस्सर क नियाउ क सिंहासन क आगे होइ क बा। 11पवित्तर सास्तरन में लिखा बा:

“पभू कहे बा, मोरे जीवन क कसम हर कीहीउ क मोरे सामने घुटना टेइक होई। अउर हर जुबान परमेस्सर क पहिचानी।”

यसायाह 45:23

12तउन हममे स हर एक क परमेस्सर क आगे आपन लेखा-जोखा देइ क होई।

पाप क बरे प्रेरित न करा

13तउन हम आपस में दोख लगाउब बन्द करी अउर इ निश्चय करी कि अपने भाई क रस्ता में हम कउनउ अइजन खड़ी न करबइ अउर न ही ओका पाप क बरे उकसउबइ। 14पभू ईसू में आस्थावान होइके कारण मई मानत हउँ कि अपने आप में कउनउ खाना अपवित्तर नाहीं बा। उ केवल ऊही क बरे अपवित्तर बा, जे ओका अपवित्तर मानत ह। ओकरे बरे ओकर खाब अनुचित बा। 15अगर तोहर भाई क तोहरे खाना स ठेस पहुँचत ह तउ तू सहीयउ में पियार क व्यउहार नाहीं करत अहा। तउ तू अपने खाना स ओका ठेस न पहुँचावा काहेकि मसीह उ तलक क बरे उ आपन प्रान तजेस। 16तउन जउन तोहरे बरे अच्छा बा ओका दूसरे लोगन द्वारा निन्दनीय ना बनइ द्या।

17काहेकि परमेस्सर क राज्य बस खाब-पीयब नाहीं बा, पर धार्मिकता, सान्ति अउर पवित्तर आत्मा स मिला आनन्द में बा। 18जउन मसीह क एह तरह सेवा करत ह, ओसे परमेस्सर खुस रहत ही अउर लोग ओका स्वीकार कहिरीं।

19एह बरे हम पचे ओन्हन बातन में लगा रही जउन सान्ति क बढ़ावत ह अउर जेहसे एक दूसरे क आत्मिक बढ़ोत्तरी में सहायता मिलत ह। 20खाना बरे परमेस्सर क काम क न बिगाड़ा। हर तरह क भोजन पवित्तर अहइ किन्तु कउनो भी व्यक्ति क बरे कछू भी खाना ठीक नाहीं अहइ जउन कउनो अउर भाई क पाप क रास्ते पर लइ जाइ। 21मांस नाहीं खाब अच्छा बा, दाखरस नाहीं पिअब अच्छा बा अउर कछू अइसेन नाहीं करब अच्छा बा जउन तोहरे भाई को पाप में ढकेरत ह।

22अपने बिसवास क परमेस्सर अउर अपने बीच में ही रखा। उ धन्य अहइ जे जउन उही करत ह, जेका उ उचित

समझत ह बिना अपने का दोसी समझत भए। 23परन्तु अगर केउ अइसेन चीजी क खात ह, जेकरे खाइ क बरे उ आस्वस्त नाहीं अहइ तउ उ दोसी ठहरत ह। काहेकि ओकर खाब ओनके बिसवास क अनुसार नाहीं बा अउर उ सब कछू जउन बिसवास पे नाहीं टिका बा, पाप अहइ।

15 हम जउन आत्मिक रूप स सवित्तसाली अही, ओन्हे ओनकर कमजोरी सहइ चाही जउन सवित्तसाली नाहीं अहइँ। हम बस अपने आपके उ खुस ना करी। 2हम पचन में स हर एक, दूसरे क अच्छाइयन बरे इ भावना क साथे कि ओनके समुदाय क आत्मिक बढ़ोतरी होइ, ओन्हे खुस करी। 3इहाँ तक कि मसीह तउ खुद क खुस नाहीं किहे रहा। बल्कि जइसेन कि मसीह क बारे में पवित्तर सास्तरन कहत ह, “ओनकर अपमान जे तोहर अपमान किहे अहइँ, मोह पड़ आइ पड़ा बा।” 4सब उ बात जउन पवित्तर सास्तरन में पहिले लिखी गइ रहिन, हमका उपदेस देइ क बरे रहिन ताकि जउन धीरज अउ बढ़ावा सास्तरन स मिलत ह, हम ओसे आसा पाइ सकी। 5अउर समूचा धीरज अउर बढ़ावा क स्रोत परमेस्सर तोहे बरदान देइ कि तू पचे एक दूसरे क साथे ईसू मसीह क इच्छा पे चलत-चलत आपस में मिलि-जुलिके क रहा। 6ताकि तू सब एक साथे में एक सुर स हमरे पभू ईसू मसीह क परमपिता, परमेस्सर क महिमा प्रदान करा। 7इही बरे एक दूसरे क अपनावा जइसे तोहे मसीह अपनाएस। इ परमेस्सर क महिमा क बरे करा। 8मई तोहे लोगन क बतावत अही कि इ परगट करइ कि परमेस्सर बिसवासनीय बा ओकरे पूर्वजन क दीन्ह गवा परमेस्सर क बचन क मजबूत करइ क मसीह यहूदियन क सेवक बना। 9ताकि गैर यहूदियन उ परमेस्सर क ओकरी दया बरे महिमा प्रदान करइँ। पवित्तर सास्तरन कहत ह:

“इही बरे मई गैर यहूदियन क बीच तोहे पहिचनबइ अउर तोहरे नाउँ क स्तुति गाउबइ।”

भजन संहिता 18:49

10अउर फिन पवित्तर सास्तर इहउ कहत ह,

“गैर यहूदियन परमेस्सर क लोगन क साथे खुस रहा।”

व्यवस्था विवरण 32:43

11अउर फिन पवित्तर सास्तर इहउ कहत ह,

“गैर यहूदियन, तू पभू क स्तुति करा। अउर सभन लोगन परमेस्सर क स्तुति करा।”

भजन संहिता 117:1

12अउर फिन यसायाह भी कहत ह,

“यिसै क एक बंसज परगट होई जउन गैर यहूदियन क सासक क रूप में उभरी! गैर यहूदी ओहपे आपन आसा लगइहीं।”

यसायाह 11:10

13सभन आसा का दाता परमेस्सर, तोहे पूरा आनन्द अउर सान्ति स भरि देइ। जइसेन कि ओहमे तोहार बिसवास बा।

ताकि पवित्तर आतिमा क सक्ति स तू आसा स भरपूर होइ जा।

पौलस द्वारा अपने पत्र अउर कारज क चर्चा

14मोरे भाइयो तथा बहिनियो, मोका खुदइ तोह पे भरोसा बा कि तू नेकी स भरा अहा अउर ज्ञान स परिपूर्ण अहा। तू एक दूसरे क उपदेस दइ सकत ह। 15परन्तु तोहे फिन स याद देवावइ क बरे मई कछू विषय क बारे मँ साफ साफ लिखे हउँ। मई परमेस्सर क जउन अनुग्रह पाएउँ ह, ओकरे कारण इ किहेउँ ह। 16काहेकि मई गैर यहूदियन क बरे मसीह ईसू क सेवक बनिके परमेस्सर क सुसमाचार क उपदेस क याजक क रूप मँ काम करउँ ताकि गैर यहूदियन परमेस्सर क आगे स्वीकार करइ योग्य भेंट बन सकई अउर पवित्तर आतिमा क द्वारा परमेस्सर क बरे पूरी तरह पवित्तर बनई।

17तउन मसीह ईसू मँ एक मनई क रूप मँ परमेस्सर क बरे आपन सेवा क मोका गर्व बा। 18काहेकि मई बस ओन्हीन बातन क कहइ क साहस रखित ह जेका मसीह तउ गैर यहूदियन क परमेस्सर क आज्ञा मानइ क रस्ता देखावइ क काम मोर बचनन, मोर कामन, 19अचरज अउ अद्भुत कारजन क सक्ति अउर परमेस्सर क आतिमा क सामर्थ्य स, मोरे जरिये पूरा कीन्ह गवा। तउन यरूसलेम स लइके इल्लुरिकुम क चारउ ओर मसीह क सुसमाचार क उपदेस क काम मई पूरा किहेउँ। 20मोरे मने मँ हमेसा इ अभिलासा रही बा कि मई सुसमाचार क उपदेस उहाँ देउँ जहाँ क लोग मसीह क नाम नाहीं जानतेन, ताकि मई कउनो दूसरे मनइ क नीव पे निर्माण न करउँ। 21परन्तु पवित्तर सास्तरन कहत ह:

“जेनका ओनके बारे मँ नाहीं बतावा गवा बा, उ पचे देखिहीं। अउर जे सुने तलक नाहीं बा, उ पचे समझिहीं।”

यसायाह 52:15

पौलस क रोम जाइ क योजना

22मोरे इ सबइ कर्तव्य मोका तोहरे पास आवइ स बार बार रोकत रहेन।

23परन्तु काहेकि अब इस प्रदेसन मँ कउनउ स्थान नाहीं बचा बा अउ बहुत बरसन स मई तोहसे मिलइ का उत्कंठित हउँ। 24तउन मई जब स्पेन जाब तउ आसा करत हउँ तोहसे मिलबइ। मोका उम्मीद बा कि स्पेन जात तोहसे भेंट होई। तोहरे साथे कछू दिन ठहरइ क आनन्द लेइ क बाद मोका आसा बा कि उहाँ क जात्रा क बरे मोका तोहार मदद मिली। 25परन्तु अब मई परमेस्सर क पवित्तर लोगन क सेवा मँ यरूसलेम जात हउँ। 26काहेकि मैसीडोनिया अउ अखया क कलीसिया क लोगन यरूसलेम मँ परमेस्सर क पवित्तर लोगन मँ स जउन दरिद्र अहई, ओनके बरे कछू देइ क निश्चय किहे अहइ। 27हाँ, ओनके बरे ओनकइ कर्तव्य इ बनत ह काहेकि अगर गैर यहूदियन यरूसलेम क यहूदियन क आत्मिक कामन मँ हिस्सा बाँटत हीं तउ गैर यहूदियन क भी ओनके बरे भौतिक सुख जुटावइ चाही।

28तउन आपन इ काम पूरा कइके अउर इकठ्ठा कीन्ह गवा इ धने क सुरच्छा क साथे ओनके हाथे सौपी क मई स्पेन जाब, अउर रस्ते मँ तोहसे मिलब। 29अउर मई जानित ह कि जब मई तोहरे लगे अउबइ तउ तोहरे बरे मसीह क पूरा आसीर्वादन समेत अउबइ।

30भाइयो तथा बहिनियो, तोहमँ स मई पभू ईसू मसीह कइँती स आतिमा स जउन पिरेम हम पाइत ह, ओकर साच्छी दइ क पराथना करित ह कि तू मोरे कइँती स परमेस्सर क बरे सच्ची पराथना मँ मोर साथे रहब्या। 31कि मई यहूदिया मँ अबिसबासियन स बचा रहउँ। अउ यरूसलेम क बरे मोरी सेवा क परमेस्सर क पवित्तर लोग स्वीकार करई। 32ताकि परमेस्सर क इच्छा क अनुसार मई खुसी क साथ तोहरे लगे आइके तोहरे साथे आराम करउँ। 33पूरी सान्ति क धाम परमेस्सर तोहरे साथे रहइ। आमीन।

रोम क मसीहियन क पौलस क संदेश

16 मई किंखिया क कलीसिया क बिसेख सेविका हमार बहिन फीबे क तोहसे सिफारिस करत हउँ 2कि तू ओका पभू मँ अइसेन रीतो स ग्रहण करा जइसेन रीति परमेस्सर क लोगन क बरे उचित बा। ओसे तोहसे जउन कछू अपेच्छित होइ सब कछू स तू ओकर मदद करा काहेकि उ मोरे समेत बहुतन क सहायक रही अहइ।

3प्रिस्का अउर अक्विल्ला क मोर नमस्कार। उ मसीह ईसू मँ मोर सहकर्मी अहइ। 4उ पचे मोर प्रान बचावइ बरे अपने जीवन क भी दौव पे लगाइ दिहे रहेन। न केवल मई ओनकर धन्यवाद करत हउँ बल्कि गैर यहूदियन क सभन कलीसिया भी ओनकर धन्यवादी अहई। 5उ कलीसिया क भी मोर नमस्कार जउन ओनके घरे मँ इकठ्ठा होत ह।

मोरे पिआरा दोस्त इपैन्तुस क मोर नमस्कार जउन एसिया मँ मसीह क अपनावइ वालन मँ पहिला बा। 6मरियम क, जे तोहार बहुत महत्वपूर्ण कार्यका अहइ, नमस्कार। 7मोरे कुटुम्बी अन्द्रनीकुस अउर यूनियास क, जउन मोरे साथे कारागार मँ रहेन, अउर जउन प्रमुख धर्मप्रचारकन अउर जउन मोसे भी पहले मसीह मँ रहेन मोर नमस्कार। 8पभू मँ मोरे पिआरा दोस्त अम्प्लियातुस क नमस्कार। 9मसीह मँ मोरे कार्यकर्ता उरबानुस अउर मोरे पिआरा दोस्त इस्तखुस क नमस्कार। 10मसीह मँ खरे अउ सच्चा अपिल्लेस क नमस्कार। अरिस्तुबुलुस क परिवार क नमस्कार। 11यहूदी साथी हेरोदियोन क नमस्कार। नरकिस्सुस क परिवार क लोगन क नमस्कार जउन पभू मँ अहई। 12त्रुफेना अउर त्रुफेसा क जउन पभू मँ मेहनती कार्यकर्ता अहई, नमस्कार। मोर पियार परसिस क, जे पभू मँ कठिन मेहनत किहे अहइ, मोर नमस्कार। 13पभू क असाधारण सेवक रूफुस क अउ ओनकी महतारी क, जउन मोर भी महतारी रही अहइ, नमस्कार। 14असुंक्रितुस, फिलगोन, हिर्मस, पत्रुबास, हिर्मोस अउर ओनके साथी बन्धुवन जउन ओनके साथ अहई क नमस्कार। 15फिलुलुगुस, यूलिया नेर्युस अउर ओकर बहिन उलुम्पास अउर ओनके सभन साथी सन्तन क नमस्कार। 16तू लोग पवित्तर चुंबन द्वारा एक दूसरे क

स्वागत करा। तोहे सभन मसीही कलीसियन कईंती स नमस्कार।

17भाइयो तथा बहिनियो! मई तू पचन स पराथना करत हउँ कि तू पचे जउन सिच्छा पाया ह, ओकरे विपरीत तू सबन में जउन फूट डारत हीं अउर दूसर क बिसवास क बिगाड़त हीं। ओनसे होसियार रहा, अउर ओनसे दूर रहा। 18काहे कि इ लोग हमरे पभू ईसू मसीह क नाहीं बल्कि अपने पेट क सेवा करत हीं। अउ आपन खुसामद भरी चिकनी चुपड़ी बातन स भोला-भाले लोगन क मन को छलत हीं। 19तोहार आज्ञाकरितइ क चर्चा बाहर हर कीहीऊ तलक पहुँच चुकी बा। इही बरे तोहसे मई बहुत खुस हउँ। परन्तु मई चाहित हउँ कि तू नेकी के बरे बुद्धिमान बना रहा अउर बदी क बरे अबोध रहा।

20सान्ति क स्रोत परमेस्सर जल्दी ही सइतान क तोहरे गोड़न तले कुचर देइ। हमार पभू ईसू मसीह क तोह पे अनुग्रह होइ। 21हमार साथी कार्यकर्ता तीमुथियुस अउ मोर यहूदी साथी लूकियुस, यासोन अउर सोसिपत्रुस कईंती स तू सबन क नमस्कार।

22इ पत्र क लेखक मोका तिरतियुस क पभू में तू सबन क नमस्कार।

23मोर अउ समूची कलीसिया क आतिथ्य कर्ता गयुस क तू पचन क नमस्कार। इरास्तुस जउन नगर क खजांची अहइ अउ हमार बन्धु कबार्तुस क तोहका नमस्कार। 24*

परमेस्सर क महिमा

25ओकर महिमा होइ जउन तोहरे बिसवास क अनुसार यानि ईसू मसीह क सुसमाचार क जउन सुसमाचार क मई घोषित उपदेस देइत ह ओकरे अनुसार-तोहे सुदढ़ बनावइ में समरथ अहइ। इ सुसमाचार उ गुप्त सत्य को अभिव्यक्त करत ह जेहका परमेस्सर युगन स छिपाय रखे रहा। 26परन्तु जेका अनन्त परमेस्सर क आदेस स नबियन क लेखन द्वारा अब हमका अउ गैर यहूदियन क परगट कइके बताइ दीन्ह गवा बा जेसे बिसवास स पैदा होइवाली आज्ञाकारिता पैदा होइ। 27ईसू मसीह क जरिये उ एक मात्र ज्ञानमय परमेस्सर क अनन्त काल तलक महिमा होइ। आमीन!

पद 24 कछू यूनानी प्रतियन में पद 24 जोड़ी गइ अहइ: "हमार पभू ईसू मसीह क अनुग्रह तू सबके साथे रहइ। आमीन!"